

**Kemah pehki independencia wan
mochihki consolidación republicana**

**De la independencia a la
consolidación republicana**

Josefina Zoraida Vázquez

**Tlahtolkuepalistli ika
nawatlahtolli iaxka**

**Traducción a la lengua
náhuatl de**

Jesús Alberto Flores Martínez



EL COLEGIO DE MÉXICO
UNIVERSIDAD INTERCULTURAL DEL ESTADO DE MÉXICO
SECRETARÍA DE EDUCACIÓN PÚBLICA

KEMAH PEHKI INDEPENDENCIA WAN MOCHIHKI
CONSOLIDACIÓN REPUBLICANA

DE LA INDEPENDENCIA
A LA CONSOLIDACIÓN REPUBLICANA

KEMAH PEHKI INDEPENDENCIA WAN MOCHIHKI CONSOLIDACIÓN REPUBLICANA

DE LA INDEPENDENCIA
A LA CONSOLIDACIÓN REPUBLICANA

Josefina Zoraida Vázquez

Tlahtolkuepalistli ika nawatlahtolli iaxka
Traducción a la lengua náhuatl de
Jesús Alberto Flores Martínez

Nawatlahtolli tlen
Variante lingüística de
La Esmeralda, Chicontepec, Veracruz



EDUCACIÓN
SECRETARÍA DE EDUCACIÓN PÚBLICA

Yankuik nemilistli tlen Mexko tlalli

Tlahtolkuepalistli ika nawatlahtolli iaxka
Jesús Alberto Flores Martínez

Nawatlahtolli tlen La Esmeralda,
Chicontepec, Veracruz

Tlaixkopinketl tlen iixko ni amochtli:
Ricardo Figueroa

Achtowi edición, 2021 xiwitl

© UNIVERSIDAD INTERCULTURAL
DEL ESTADO DE MÉXICO
Libramiento Francisco Villa s/n
Col. Centro, San Felipe del Progreso
50640 Estado de México
uiem.edomex.gob.mx

© EL COLEGIO DE MÉXICO, A. C.
Carretera Picacho Ajusco 20
Col. Ampliación Fuentes del Pedregal
Alcaldía Tlalpan
14110 Ciudad de México
www.colmex.mx

Motepostlahkuilohki ipan Mexko

Ni amochtli axkanah monamaka

Nueva historia mínima de México

Traducción a la lengua náhuatl
de Jesús Alberto Flores Martínez

Variante lingüística de La Esmeralda,
Chicontepec, Veracruz

Ilustración de portada:
Ricardo Figueroa

Primera edición, 2021

© UNIVERSIDAD INTERCULTURAL
DEL ESTADO DE MÉXICO
Libramiento Francisco Villa s/n
Col. Centro, San Felipe del Progreso
50640 Estado de México
uiem.edomex.gob.mx

© EL COLEGIO DE MÉXICO, A. C.
Carretera Picacho Ajusco 20
Col. Ampliación Fuentes del Pedregal
Alcaldía Tlalpan
14110 Ciudad de México
www.colmex.mx

Impreso en México

Edición no venal

AMATEKPANTLI

Se ome tlahtolli para amapowanih

9

Nota al lector

11

Tlatewilistli tlen independencia

15

Moyankuichihki Estado mexicano

27

Pampa onkayayah amenazas extranjeras
moyehyekohki centralismo wan dictadura

39

Liberalatlanawatilli, francesatlatewilistli
wan kemah tlatlanki república

54

Tlen kenihkatzah mopatlatiyahki nacional
yolistli wan mochihki republicana

73

SE OME TLAHTOLLI PARA AMAPOWANIH

Ni tekintl tlen tihpixtok moma, kiski pampa mopalewihkeh weyi kaltlamachtiloyan Universidad Intercultural del Estado de México wan weyi kaltlamachtiloyan El Colegio de México, nohkia tlapalewihki Secretaría de Educación Pública, eli tlahtolkuepalistli ika nawatlahtolli tlen amatlahkuilolli itokah “Kemah pehki independencia wan mochihi consolidación republicana”, tlen kiihkuilohki Josefina Zoraida Vázquez, wan tlen kalaktok ipan amochtli itokah *Yankuik nemilistli tlen Mexko tlalli*, tlen kitepostlahkuilohki weyi kaltlamachtiloyan El Colegio de México.

Teipah motlahtolkuepas nochi amochtli, namanok san monextia ni amatlahkuilolli pampa moilhwichiwa 200 xiwitl tlen kemah mochihi independencia tlen Mexko. Nikah monextia san kentzih tekintl tlen mochtika para motepostlahkuilos, ipan miyakeh masewaltlahtolmeh, ni amochtli tlen tlawel ipatih pampa nopayo moihkuilotok inemilis tlen toaltepe. Ni amochtli kitlahtolkueptokeh ika matlaktli tlahtolmeh tlen sekinokeh weyi altepemeh, axkemah ika yon se masewaltlahtolli. Masewalchinankomeh miak kintlawikiliah wan namah petikah kintlaxtlawiliah kemah moilhwichiwa.

Tihnekih nochimeh yankuikah amapowanih ma yolpakikah nohkia towaya pampa mochihi ni tekintl, ma kipowakah ika inintlahtol ni amochtli kampa moihkuilotok inemilis tlen toaltepe,

10 wan nohkia tihnekih ma mochiwa miak tekitl pampa nochimeh
masewalchinankomeh tlen Mexko tlawel ipatih wan moneki
moyolchikawaseh.

NOTA AL LECTOR

La obra que el lector tiene en sus manos, producto de la colaboración entre la Universidad Intercultural del Estado de México y El Colegio de México, con el acompañamiento de la Secretaría de Educación Pública, es la traducción al náhuatl del capítulo “De la independencia a la consolidación republicana”, escrito por Josefina Zoraida Vázquez, que integra la *Nueva historia mínima de México*, publicada por El Colegio de México.

A manera de avance de la publicación de todo el libro, este capítulo se publica con motivo de la conmemoración de los 200 años de la consumación de la independencia de México. Se trata de una pequeña muestra de un proyecto editorial de envergadura orientado a la publicación, en varias lenguas indígenas, de un libro imprescindible para comprender el pasado nacional. Esta obra ha sido traducida a cerca de diez idiomas extranjeros, sin embargo, nunca a una lengua originaria. Esta deuda ha comenzado a ser saldada en el marco de la celebración bicentenaria.

Confiamos en que nuestros nuevos lectores compartan con nosotros el júbilo que esto representa, disfruten en sus lenguas este recorrido por la historia nacional y, sobre todo, hacemos votos para que este libro sea una acción más, entre muchas otras, en favor de una expansiva promoción de las culturas originarias de México.

Nikah moihkuilowa tlen panok ipan 1808 hasta 1876 xiwitl, ni kiihtosneki, nochi tlen panok kemah moxitonkeh mexkoewanih, kemah mopewaltihki se Estado nacional wan kemah motlamiltihki república, teipah kemah kintlankeh francestlakameh wan kinekiyayah ma onkah monarquistatlanawatilli. Ipan ni kawitl pehki mosemoyawah liberalismo wan nacionalismo ipan nochi altepemeh wan mokualtlalkeh wan pankiskeh Estados-nación, kampa achtowi panok ni tlamantli elki ipan iberoamericanas altepemeh.

Nopa tlatewilistli norteamericana wan francesa, teipah mosemoyahkeh ipan colonias iberoamericanas, kikalakihkeh miak tlamantli wan tlahlamikilistli ipan Estados. Nochi ni tlahlamikilistli, moixmatiyaya ken liberales ipan 1812 xiwitl, ax kikualittayaya san ma onkah monarquías, pampa nochi tlakameh wan siwameh inihuantih monekiskia tlanawatisesh wan kiihtoseh ahkia tlanawatis, wan monekiyaya onkas eyi pamitl tlen tlanawatilistli: legislativo, ejecutivo wan judicial, ihkino kualli itztoseh nochimeh wan kipiaseh kanih momanawiseh. Telpokameh wan ichpokameh weliyayah tlawasaniseh wan kiihtoseh ahkia kinnawatis, kehni mokuipayayah ciudadanos. Nochi ni yankuik tlamantli wan yankuik tlahlamikilistli kipatlak itiko altepemeh wan nohkia ken mowikayayah waya sekinokeh altepemeh, ayohkana san se ome tlanawatiyayah wan tlanamakayayah,

namah monekiyaya nochimeh weliseh tlanamakaseh, onkas kualli tlanawatilli tlen ika mopalewiseh nochimeh, motlatlepanittas nochi tlaneltokilli, motlepanittaseh tlakameh wan motlepanittas atlanawatilli tlen altepemeh, ihkatzah onkas tlatewilistli. Nochi ni tlen motlapak owi wan wahahki, axkanah nimah wan xitlawak mochihi, miak tlamantli panok ipan independencias iberoamericanas pampa eliyaya se yankuik kawitl.

Ipan Yankuik Kaxtillan mopatlak miak tlamantli pampa onkak yankuik tlanawatilli wan tlahlamikilistli “modernizadores” tlen borbónicas, mopatlak ken mowikayayah tlakameh, mopatlak políticas wan mopatlak económicas tlen mokualtlaltoya ipan ome xiwilpilli, ika nochi yani nochimeh novohispanotlakameh mosisinihkeh wan kinekiyayah moxitomaseh pampa ax kikualittayayah kenihkatzah tlanawatiyayah ipan altepetl, pampa miak tomih kintlatlaniliyayah nochimeh. Kehni, postehki monarquía ipan 1808 xiwitl wan pehki tlatewilistli liberal española, teipah mosanilos tlen yani tlamantli, wan kehnopa welki mochiwa independencia, pampa americanotlakameh welkeh kiihtowah kenihkatzah ax kintlepanittayayah wan kimachilihkeh constitucionalismo liberal español, ni yankuik tlamantli kalahki ipan tlahlamikilistli político americano ipan ompowalli xiwitl tlen yolistli nacional.

Iwikal ken sekinok virreinos hispanoamericanos, ipan Yankuik Kaxtillan nopa independencia welki mochihi pampa onkak se weyi tlatewilistli, yeka nopa Estado mexicano tlakatki yamanik, miak tlawikayaya, ax onkayaya tomih wan nochimeh tlakameh axkualli mowikayayah. Nohkia sekinokeh altepemeh kinekiyayah kitlachtekiliseh pampa

kiittayayah nopayo onkah tomih. Ihkatzah onkayaya miak kualantli, nohkia onkayaya yolchikawalistli, teipah ika owi pankiskeh ome proyectos tlen nación tlen chikawak tlatewihkeh wan nopa esquema republicano liberal tlatlanki.

15

TLATEWILISTLI TLEN INDEPENDENCIA

Ipan sociedad novohispana kalaktoyah miyakeh tlakameh. Tlen nochimeh, san 17.5% eliyayah peninsulartlakameh wan criollotlakameh, ininkonewah, ewayayah ipan altepemeh. Tlen peninsulartlakameh ax miyakeh eliyayah, nopayo kalaktoyah burócratas wan tlen nochipaya nopayo ewayayah. Tlen criollotlakameh miak momachtihtoyah wan tlen 5% kipiayah miak tomih, sekih nohkia kipiayah títulos nobiliarios; wan nohkia nikah kalaktoyah chinankotlakameh, tlanamakanih, tomichiwanih, tlanawatiyanih, religiosotlakameh wan militartlakameh, tlen kinekiyayah inihuantih tlanawatiseh. Tlen nochimeh, 60% eliyayah masewalmeh, inihuantih kimatiyayah kenihkatzah mosentiliseh. Nohkia onkayayah masewalmeh tlen sanilowayayah kaxtiltlahtolli, nopayo kalaktoyah rikotlakameh, weyi tlanawatiyanih wan tlanamakanih, miyakeh san itlahtol sanilowayayah, miak tekitiyayah wan tlaxtlawayayah tributo. Pampa mopatlak kawitl wan momoyatiyahki hacienda miyakeh tlen inihuantih momanawihkeh waya peontlakameh. Echkaya tlen 22% eliyayah castas, tlen momaneltohyah waya kaxtiltekameh, criollotlakameh, masewalmeh, negrotlakameh, mulatotlakameh wan mestizotlakameh, nochimeh inihuantih ax kipiayah tomih, ax weliyayah

tlanawatiseh wan ax weliyayah tlamachtiseh. Yeka kichiwayayah nochi tlen chikawak wan axkualli tekittl: minerotlakameh, sirvientetlakameh, artesanotlakameh, capataztlakameh, arrierotlakameh wan mayordomotlakameh. Sekih yahtoyah ipan norte kitemotoh tomih wan sekih tlen ni eliyayah mendigotlakameh, léperotlakameh wan malhehortlakameh tlen miyakeh onkayayah ipan altepemeh wan kampa mochiwayaya minatekitl. San 0.5% eliyayah negrotlakameh, inihuantih eliyayah esclavotlakameh wan kichiwayayah owatekitl.

Ipan Mexko altepetl nochi kualli eltoya, kemah ipan 8 tlen junio tlen 1808 xiwitl momatki Carlos IV kiihtohki ikone Fernando namah ya tlanawatis. Mokualltlaliyaya nochi para mochiwas ni ilhwitl wan seyok tlamantli momatki: corona namah eltoya imako Napoleón. Nochimeh motemahmatihkeh pampa moihliyayah namah tlen panos ipan Yankuik Kaxtillan.

Nochi ni tlamantli panok pampa Napoleón tlatewiyaya waya Gran Bretaña, kinekiyaya kitzakuilis nochi, yeka nohkia kinekiyaya ma Kaxtillan kinkawah ma panokah nechikolistlatewiyanih tlen francestlakameh ipan inintlal pampa kinekiyayah kimahawaseh Portugal, tlen tlatewiyayah waya británicotlakameh. Napoleón kimakak corona iikni José, achtowi kichihki se nechikolistli waya tlanawatiyanih kampa kinmakak kaxtiltekameh se amatlanawatilli kampa moihkuilohtoya inihuantih kipiah xitlawalistli wan iwikalistli, wan nohkia para americanotlakameh.

Kaxtiltekameh ax kikualittakeh nopa tlamantli wan mosisinihkeh wan kiihtohkeh tlatewiseh. Monechikohkeh wan mononotzkeh kenihkatzah mosenkawaseh, yeka kiihtohkeh

mochiwas san se weyi tlasentilistli. Ni tlasentilistli axkualli elki, yeka mochihki seyok yankuik wan onkak tlaphepenalistli a Cortes (ni kiihtosneki kampa kalaktoyah tekiwameh tlen noblezatlakameh, clerotlakameh wan chinankotlakameh), nochimeh inihuantih mokuanehnemilihkeh kenihkatzah elis yankuik tlanawatilistli ipan imperio kemah axkanah itztos nelrey.

Ihkatzah novohispanotlakameh kiihtohtoyah kena kitlepanittaseh Fernando VII, ne ayuntamiento tlen Mexko wan sekinokeh tlen imperio, kiihtoheh pampa ax itztok rey namah tlanawatis ne reino, wan monekiyaya mosentiliseh nochimeh ayuntamientos wan kichiwaseh seyok tlanawatilli. Ne virrey José de Iturrigaray kiihtoheh kena, pero sekinokeh tlen tlatzkitoyayah ipan real acuerdo (kampa tlanawatiyaya ne virrey) kiihtoheh axkanah pampa welis nochiwas independencía. Sekih kineltokayayah ni tlamantli, pampa moihliyah ne reino kipiaya miak tomih wan welis kinmakas wan kualli itztoseh, pero achi miyakeh kinekiyayah nel nelia moxitomaseh pampa nopa eliyaya se xitlawalistli.

Kehnopa panok wan kemah nopa reino kinekiyaya kichiwaseh seyok nechikolistli iwikal ken península, sekih burócratatlakameh wan tlanamakanih kikuallalkeh se golpe de Estado. Ipan tlahoyowal tlen 15 tlen septiembre tlen 1808, 300 tlakameh tlen kinnawatiyayah ne ricotlakatl Gabriel de Yermo kalahkeh ipan palacio wan kiitzkihkeh virrey waya iteixmatkawa. Nohkia kinitzkihkeh tlanawatiyaneh tlen ayuntamiento. Nohkia ipan kalli kampa mosentiliyah moihtowayaya namah elis virrey se militartlakatl tlen nel piltetatzih. Nopa golpe ax kitlepanittayaya xitlawalistli wan motekiwiyaya tlatewilistli. Nochi tlen kichihkeh

peninsulartlakameh kinyolpachkih criollotlakameh wan inihuantih pehkeh mononotzah kemah ax kinittayayah, nochi ni panok kemah tlawaktoya wan ax onkayayah xinachmeh. Ipan nechikolistli tlen Sevilla kiihtohkeh elis virrey ne arzobispo Francisco Xavier Lizana, wan teipah kiski tlen achtowi conspiración ipan Valladolid. Ax wahahki kixoxoletzkeh, pero ne arzobispo-virrey san kintotokak ahkia inihuantih kalaktoyah. Nopa conspiración asitoyaya ipan Querétaro, kampa miak ohtli moixnamikiyayah. Ipan icha tlen corregidortlakameh Miguel wan Josefa Domínguez mochiwayayah “tertulias literarias” kampa asiayah capitantlakameh Ignacio Allende wan Juan Aldama, sekih sacerdotetlakameh, tlanamakanih wan cura tlen Dolores, Miguel Hidalgo, se tlakatl tlen tlamatiyaya wan eliyaya exrector tlen Colegio tlen San Nicolás tlen Valladolid. Tlen motlatinemiyayah kinekiyayah kipewaltiseh se tlatewilistli ipan diciembre, kemah nohkia mochiwayaya feria tlen San Juan tlen los Lagos, pero kintlateilihkeh, wan yeka Allende, Aldama wan Hidalgo pehkeh tlatewiyah. 16 tlen septiembre eliyaya domingo, onkayaya misa, wan kemah mosentiltoyah feligrestlakameh kinilihki ma momanawikah wan ma kintewikah axkualli tlanawatiyanih . Peontlakameh, tlaltekinih wan artesanotlakameh, waya ininsiwah wan ininkonewah , kiitzkihkeh wapalmeh, tlen ika tekitiyayah, wan kitokilihkeh ne cura.

Nopa yowalli, tlen tlatewiyayah tlatlankeh ipan San Miguel el Grande wan teipah ipan Celaya, nochimeh kitokaxtihkeh generalísimo ne Hidalgo wan teniente general ne Allende. Ipan santuario tlen Atotonilco, Hidalgo kinmakak tlatewiyanih tlen achtowi bandera: se

ixkopinkayotl tlen tonantzih Guadalupe. Ome semana teipah, insurgentetlakameh echkaya kalakiskiah ipan altepetl tlen Guanajuato. Hidalgo kiihlihki ne intendente Juan Antonio Riaño ma ayohkana tlatewi, ax kinehki wan mokaltzahki ipan alhóndiga tlen Granaditas waya ricotlakameh wan itomih. Hidalgo kiihtohki ma tlatewikah, wahahki nopa tlatewilistli wan tlatlankeh, teipah tlatewiyanih kalahkeh ipan alhóndiga wan fiero kinmiktihkeh nochimeh, Hidalgo wan Allende axtlen welkeh kichiwah. Tlen nopa panok sekinokeh ax kikualittakeh wan yeka wahahki para tlatlankeh.

Ipan nopa tonatih asitohyaya ipan altepetl se convocatoria para kinpehpenaseh 17 diputadotlakameh tlen kiyekanaseh Yankuik Kaxtillan ipan Cortes de Cádiz, nopa tlamantli ax kikualittakeh miyakeh. Kipatlak arzobispo ne Francisco Xavier Venegas, tlen elki virrey se ome tonatih achtowi kemah pehki tlatewilistli, ya pehki tlatewiya ihkatzah ax momatiyaya ipan reino. Nimah kiihlihki ne general Félix María Calleja ma yowi kampa Mexko wan ma kikuiti tonantzih tlen Remedios ipan ne altepetl.

Ihkatzah onkayaya temahmatilli, nopa tlatewilistli mosemoyahki ipan nochi novohispano tlalli. José María Morelos, cura tlen Carácuaro, moixtlalito waya Miguel Hidalgo wan ya kinawatihki ma tlatewiti Acapulco. José Antonio Torres tlatewito Guadalajara wan kehni mochihki ipan miyakeh altepemeh. Nopa Manuel Abad y Queipo, tlen eliyaya obispo electo tlen Valladolid, kinekiyaya ma ax onkah kualantli wan nopa novohispanotlakameh ma kualli itztokah, ya ax kikualittayaya tlatewilistli wan kitotokak Hidalgo. Kemah kimatki insurgentetlakameh nehnemiyayah asitih Valladolid, ya cholohki wan tekiwameh kiihtohkeh

ma panokah pampa ax kinekiyayah ma kinmiktikah iwikal ken Guanajuato wan nopa tlaneltokillitlanawatiyaneh sampa kiselihkeh ne don Miguel.

Kemah tlamitia octubre, tlatewiyaneh tlen Hidalgo itztoyah ipan las Cruces tepetl, echkatzih ne Mexko altepetl, ipan tonatih 30 tlen octubre nochimeh tlakameh tlatewihkeh wan kintlanihkeh se mil realistas criollotlakameh. Altepetl moyolpitzahki. Hidalgo kinekiyaya mononotzas waya virrey wan teipah kinihlihi nochimeh ma mokuepakah, ax tihmati kenke: ¿pampa ax kipalewihkeh masewalchinankomeh tlen valle tlen Toluca? ¿Motemahmatih toyaya ika tlen kichihki ipan Guanajuato? ¿Moihliyaya kitlaniseh tlatewiyaneh tlen Calleja? Teipah ayohkana tlatlanki kemah tlatewiyaya, se ome tonatih teipah insurgentetlakameh tlatewihkeh waya realistatlatewiyaneh ipan Aculco wan ax tlatlankeh. Allende, mosisinihki pampa Hidalgo ayohkana kualli tlanawatiyaya, teipah yahki Guanajuato, wan cura kiitzkihki ohtli Guadalajara.

Ipan altepetl ika pakilistli kiselihkeh Hidalgo. Ya asito ika weyi tokayotl tlen alteza serenísima, moihlihi kinihkatzah tlanawatis, kiihtohki ma mosemoyawa nopa tlatewilistli, kiihtohki ma mochiwa nopa periódico itokah *El Despertador Americano*, kiihtohki ayohkana onkas esclavitud, masewalmeh ayohkana tlaxtlawaseh wan weliseh tlanamakaseh, wan kiihtohki comuntlalli san masewalmeh kintekiwiseh. Nohkia tlanawatihki ma kinmiktikah kaxtiltekameh tlen kintzaktoyah. Ax wahahki Allende sampa mokupekhi, pampa ayohkana welki tlatlanki, nohkia tlatewiyaneh tlen Calleja wan tlen José de la Cruz, tlen onasitohya tlen Kaxtillan, nehnemiyayah asitih Guadalajara. Ihkatzah moihliyaya

axkualli momanawiseh, Allende kiihtohki moneki tlatewiseh. Wan nochi axkualli elito, ipan 17 tlen enero tlen 1811 ipan puente tlen Calderón, 5 000 realistas kintlankeh 90 000 insurgentetlakameh.

Tlanawatiyanih tlen insurgentetlakameh cholohkeh wan teipah yahkeh ipan norte kitemotoh norteamericana tlapalewilstli. Ipan hacienda tlen Pabellón, Allende waya Aldama kikixtilihkeh kuatopilli Hidalgo, wan ipan Saltillo mosenkahkeh Ignacio López Rayón ya kiyekanas tlatewilstli. Teipah onkak se tlakakayawalistli tlen ika kinitzkihkeh Allende, Aldama, Hidalgo wan José Mariano Jiménez, teipah kinwikakeh Chihuahua kampa kintzahkeh. Hidalgo kiihtohki kena kipiaya tlatlakolli pampa onkak tlatewilstli wan ya tlanawatihki ma kinmiktikah kaxtiltekameh “ihkatzah ax weliyayah momanawiseh”. Inintzontekoh tlen nopa nawi tlanawatiyanih kintitlankeh Guanajuato, motlalkeh ipan nawi esquinas tlen alhóndiga de Granaditas, tlatewilstli chikawak kimakiltoyaya ne virreinato wan melawak pa nimah mikiskia, kitlapanki tlanawatilistli colonialyotl wan nohkia kimakilki ne economía wan administración fiscal.

Ihkino, ne Cortes tlen Kaxtillan mosentiliyayah ipan Cádiz, pampa kinekiyayah kiyankuiliseh tlanawatilli pampa ax itztoya nopa rey. Nochi tlamantli tlen panoyaya ipan Cortes tlen península kimatiyayah novohispanotlakameh wan mokuanehnemiliyayah. Miak sasanilli onkak wan mochihki Amatlanawatilli tlen 1812, tlen monextihki ipan Mexko ipan septiembre. Ika ni yankuik weyi amatlanawatilli motlaliyaya se monarquía constitucional, tlen kipiaya miak pamitl, ayohkana onkas tlaxtlawalistli, onkas masewaltlanawatiyanih (chikuase ipan Yankuik Kaxtillan)

wan ayuntamientos constitucionales ipan nochi altepetl kampa itztoseh se mil tlakameh, ika yani monekiyaya ma nochimeh kualli itztokah, ma ayohkana onkah kualantli, ma ayohkana onkah temahmatilli, wan ma momanawikah. Ayohkana onkayayah virreyes, san políticotlanawatiyanih. Criollotlakameh kikualittayayah nopa yankuik amatlanawatilli pampa nopayo moihkuilohtoya inihuantih kipiah xitlawalistli, pero inihuantih temikiyayah nel nelia moxitomaskiah.

Americanotlakameh kitekiwihkeh xitlawalistli tlen sasanilli para kiihkuiloseh itlahlamikilis ipan periódicos wan ipan sekih pilamatzitzih, Venegas kitzahki nochi yaino. Nohkia Calleja tlatewiyaya waya insurgentetlakameh wan kintlanki, yeka kitokaxtihkeh políticotlanawatihketl, wan kipatlak Venegas. Calleja kisemoyahki amatlanawatilli para ma ayohkana onkah tlatewilistli, wan teipah kixoxoletzki kemah elki weyi tlanawatihketl Fernando VII ipan 1814, pampa kitzakuiliyaya. Kehni, novohispanotlakameh kentzih kimachilihkeh wan kikuamachilihkeh tlen kiihtosneki eliseh ciudadanos.

Rayón kinyekanayayah insurgentetlakameh, wan kitlalki se Suprema Junta Gubernativa tlen América. Tlakameh tlen “Guadalupes” kinpalewiyayah insurgentetlakameh, kintitlaniliyayah tomih, tlahlamikilisti wan chikawalistli, teipah Calleja ax wahahki kintotokak ne Zitácuaro. Ipan nopa kawitl onpankisayaya seyok tlatewihketl itokah cura Morelos. Ya eliyaya se arriero wan kualli kiixmatiyaya nochi ohtli wan tlakameh, ya kikualtlalki se nechikolistli tlen tlatewiyanih, axkanah miyakeh eliyayah, peroh nel kualli tlatewiyayah, nopa tlakatl tlawel tlahlamikiyaya wan miak tlamantli kichiwayaya. Tlatewiyaya waya Hermenegildo

Galeana, wan Mariano Matamoros, iwampoyowah tlen tlawel kinikneliyayah, wan nohkia kitokiliyayah Nicolás Bravo, Manuel Mier y Terán, Guadalupe Victoria wan Vicente Guerrero, yeka tlatlanki ipan Chilpancingo, Tixtla, Chilapa, Taxco, Izúcar wan Cuautla. Nikah tlatewihki waya Calleja wan tlaihyowihki ome metztli, ika owi cholohki. Insurgentetlakameh tlatewiyayah wan san kampa weli tlatlankeh, yeka Morelos kiihtoohki moneki mochiwas se nechikolistli tlen tlanawatiyanih wan mosenkawaseh. Nopa nechikolistli pehki ipan 14 tlen septiembre tlen 1813 ipan Chilpancingo kemah mopohki nopa “Sentimientos a la Nación”, kampa Morelos kiihtoohki América tlalli ax kiilpitokeh, tlakameh inihuantih tlanawatiseh wan tlanawatilistli moxolewas ika eyi pamitl, onkas tlanawatilistli wan tlapalewilistli para nochimeh. Teipah kemah kiwasanikkeh xitlawalistli tlen independencia, nopa nechikolistli tlen tlanawatiyanih kimakak kuatopilli tlen ejecutivo ne Morelos, kitokaxtihkeh Siervo de la Nación. Nopa weyi amatlanawatilli kiihkuilohki nechikolistli tlen tlanawatiyanih wan moitzkitohya waya amatlanawatilli tlen Xaxtillan tlen 1812, monextihki ipan Apatzingán ipan 22 tlen octubre tlen 1814. Nechikolistli tlen tlanawatiyanih teipah ax kitlepanittakeh Morelos wan kikixtilihkeh nochi. Tlatewilistli nohka yoltoya; Morelos tlatlanki ipan Acapulco, kipolki ipan Valladolid, wan kiitzkihkeh ipan 5 tlen noviembre tlen 1815; teipah kitzahkeh wan kimiktihkeh ipan 22 tlen diciembre ipan San Cristóbal Ecatepec.

Ipan nopa kawitl ipan reino onkayaya miak kuesolli pampa wahahkia tlatewiyaya. Ax onkayaya tomih. Insurgentetlakameh ipan miak chinankomeh wan altepemeh

tlatlantohyah, yeka axkualli eltoya nochi. Tlen moyolchikahkeh wan moricotihkeh elihkeh nopa tlanawatiyanih tlen tlatewiyanih —insurgentetlakameh wan realistatlakameh— san inihuantih moyolchikahkeh. Ipan Yankuik Kaxtillan nesiyaya ayohkana onkah kualantli, kaxtilantlanawatiyanih moihlihkeh ayohkana kualli tlatewiseh wan monekiyaya moikneliseh. Juan Ruiz Apodaca kitokaxtihkeh virrey ipan 1816 wan nimah kiihtohki ya kinpalewis insurgentetlakameh, sekinokeh kiihtohkeh kena. Nesiyaya nochi kualli eltok, wan ipan 1817 padre Servando Teresa de Mier wan kaxtiltlakatl Francisco Xavier Mina sampa kinehkeh tlatewiseh wan moxitomaseh, axtlen panok. Ika 300 tomitlaniyanih, Mina kalahki ipan Bajío, pero kitlanihkeh realistlatewiyanih wan nohkia kimiktihkeh ipan 11 tlen noviembre tlen nopa xiwitl. Mier ya kitzahkeh ipan San Juan de Ulúa.

Axaka kinekiyaya kitlepanittas corona pampa axkualli tlanawatiyaya, wan ipan enero tlen 1820 onkak se weyi kotontli para welis mochiwas independencia. Ipan península, tlatewihketl Rafael de Riego kiihtowayaya ma sampa motlali Amatlanawatilli tlen 1812, wan ma motlali nimah ipan enero wan ma kiihto nopa rey kena kitlepanittas, kena kehnopa mochihki wan kinnonotzkeh nochimeh pampa onkas tlapehpenalistli a Cortes.

Ipan nopa kawitl nochimeh tlawel siatokeh eliyayah, ipan Yankui Kaxtillan nochi mopatlatoya wan nohkia peninsulartlakameh kinekiyayah ma onkah independencia, nochimeh yaino kinekiyayah. Weyi tlanawatiyanih tlen tlatewiyanih wan iglesiatlanawatiyanih nohkia kinekiyayah, pampa moihliyayah nopa yankuik Cortes kinkixtilis ichikawalis. Sekinokeh nechikolistli kinekiyayah seyok

amatlanawatilli tlen reino, wan sekinokeh kinekiyayah ma motlali se república. Pampa motlalki nopa yankuik tlanawatilli kinxitonkeh nochimeh insurgentetlakameh tlen kintzaktoyah wan sampa nochimeh tlakameh wan siwameh welkeh mononotzah wan pankiskeh miyakeh amochmeh wan amameh. Nohkia onkak tlasentilistli para kinpephenaseh diputados a Cortes, diputados tlen chinankomeh wan ayuntamientos constitucionales, ika yaini sampa mokualanikkeh.

Kemah nochi kehni tlaeltoya realistlakameh kiihtohkeh ma sampa tlatewikah wan moxitomakah. Yaino kinekiyaya kichiwas Agustín de Iturbide, se criollotlakatl tlen tlakatki ipan Valladolid, kinekiyaya ma moxitomakah wan ma ax onkah tlatewilistli. Ipan 1815 kiihtohki ya kimati kenihki weliskiah moxitomaseh, monekiyaya san sehko tlatewiseh ome americanechikolistli tlen tlatewiyanih. Nopa Agustín axkemah kipoltoya yon se tlatewilistli, san se weltah kitlateilihkeh wan mokotonki nochi iteki wan yeka ayok tlen kichihki. Ya miak tlatewihtoya wan tlawel mokuanehnemiliyaya nochi tlen panoyaya, ni tlakatl nohkia kinixmatiyaya miyakeh tlakameh wan kualli waya mowikayaya novohispanotlakameh, nochi ni tlamantli mokuanehnemiliyaya wan moihliyaya kenihkatzah moxitomaseh wan axkanah tlatewiseh. Pampa kualli iteki wan itlahlamikilis sekinokeh tlakameh tlen ax kinekiyayah amatlanawatilli monechkawitoh, pero nopa tlakatl ax kinehki tekitis san waya inihuantih pampa ya kinekiyaya tekitis waya nochimeh. Teipah Apodaca kiihlihki kimakas kuatopilli wan ya tlayekanas ipan sur wan welis kimapachos Guerrero, Iturbide moihlihki tlawel kualli nopa tlamantli

wan yeka nohkia kinyolmelahki novohispanotlakameh tlen tlanawatiyayah wan yowiyayah Kaxtillan.

Iturbide moihliyaya kena kitlanis Guerrero, pero axkanah welki kichiwa wan yeka kiihlihki ma tlatewikah san sehko. Guerrero nohkia moihliyaya itztok iselti wan monekiyaya ni tlamantli: weliskiah moxitomaseh tlan tlatewiskiah waya se realstatlanawatihketl. Achtowi axkanah nel kineltokayaya pampa wahkacia waya motewihki, pero nopa Iturbide kiihlihki kimakas miak tlamantli wan kehnopa kiihtohki kena, yeka kinihlihki nochimeh tlatewiyanih namah ya kinyekanas wan ma kitokaxtikah “weyi tlanawatihketl tlen nacionaltlatewiyanih”.

Iturbide kinekiyaya ma nochimeh kineltokilikah, yeka kiihtohki onkas eyi garantías: tlaneltokilli, tlapalewilistli wan independencia, nochi ni eltoya ipan empeños criollos tlen 1808 wan tlen insurgentetlakameh; tlen tlapalewilistli kinekiyaya kinyolsewis peninsulartlakameh. Ipan 24 tlen febrero tlen 1821, ipan Iguala, mochihki seyok amatekitl. Kintitlanilihkeh amameh ne rey, nochimeh tlamokuitlawiyanih wan nochimeh realstatlanawatiyanih wan insurgentetlanawatiyanih. Nopa amatekitl ika pakilistli kiselihkeh tlakameh wan tlatewiyanih, san axkanah kikualittakeh weyi peninsulartlanawatiyanih.

Ipan nopa kawitl kemah nochi yaino panoyaya, ipan Madrid, novohispanotlanawatiyanih kisewihkeh se liberaltlakatl itokah Juan de O’Donojú ya elis weyi tlayekanketl tlen Yankuik Kaxtillan. Nohkia kikualtlalihkeh se amatekitl tlen federalista ipan junio tlen 1821, pero ax kikualittakeh wan axkanah kiselihkeh, yeka yahkeh. O’Donojú asiko Veracruz ipan julio, kemah tlatewilistli tlen Iguala

mosemoyatoyaya ipan nochi virreinato, kehnopa moihlihki axaka kicketzas nopa independencia. Yeka kinyolmelahki altepetlanawatiyanih axtlén welis kichiwas: “tohuantih timachiltokeh ya tlen pano kemah nochimeh tlakameh kinekih independencia”. Teipah kinehki mononotzas waya Iturbide, inihuantih kiwasanihkeh amatlanatawilli tlen itokah Tratados de Córdoba kampa moihkuilohtoya independencia wan pewalistli tlen Imperio Mexicano, nohkia moihkuilohtoya nopayo nohka moitzkitok waya Kaxtillan pampa kiyekanayaya se tlakatl tlen dinastiatlanawatiyanih. Nimah, O’Donojú kinehki ma nopa tlatewiyanih tlen itztoyah ipan altepetl ma ayohkana tlatewikah, ma kinmalakanikah inintepos, wan kehnopa ipan 27 tlen septiembre tlen 1821 ipan nopa altepetl kinselihkeh ika xochiwitolli wan ika miak pakilistli ne tlatewihketl Iturbide, Guerrero wan Ejército Trigarante. Ika nehnemilli, tlatopontli wan wikalistli nochimeh yolpahkeh pampa welki mochiwa independencia, ihkatzah momatiyaya nohka onkayaya kualantli waya realistlakameh wan insurgentetlakameh.

MOYANKUICHIHKI ESTADO MEXICANO

Tlatewilistli wan Amatlanawatilli tlen 1812 kichihtoyah ma onkah miak kualantli ipan Yankuik Kaxtillan, kipiaya miak tlalli pero ax onkayayah miyakeh tlakameh, wan ipan norte walayaya expansionismo tlen Estados Unidos. Ihkatzah onkayaya miak kualantli, axkanah san sehko tekitiyayah, mokualaniyayah, tlawikayayah miak tomih 45 millones tlen pesos wan ax onkakayah kualli tlanawatiyanih, nopa

altepetl moyankuichiwayaya. Nopa tlakatl O'Donojú ya tlapalewiya para moyankuichiyas Estado, pero mihki ipan octubre wan ayohkana welki tlapalewia, tlawel kualli tlayekanketl eliyaya. Kehni, kemah tlanki ilhwitl, nopa altepetl miak tekitl kipiaya, monekiyaya kitlamokuitlawis nochi tlalli, kitlalanas tomih, kinihlis nochimeh tlakameh wan siwameh ma kitlepanittakah wan nohia kichiwas ma kitlepanittakah nochimeh altepemeh tlen tlaltipaktli para kualli mowikaseh.

Iturbide kichihki se yankuik nechikolistli itokah Junta Provisional Gubernativa waya sekih iwampoyowah pero ax onkayayah insurgentetlakameh, nohia waya makuilli tlakameh tlen kiskeh ipan tlasentilistli. Iturbide, eliyaya tlanawatihketl, wan pa nimah kiihtohki moneki mosentiliseh wan kiittaseh ahkia inihuantih eliseh tlanawatiyanih diputados para ne nacionalnechikolistli kampa moihkuilos amatlanawatilli tlen imperio, pero ax kitlepanittayaya amatlanawatilli tlen 1810 para kintlaliseh diputados a Cortes, yeka moihlihki san se ome tlanawatiyanih eliseh. Kehnopa kintlalihkeh diputados, wan nopa nechikolistli pehki tekiti ipan 24 tlen febrero tlen 1822. Ipan nopa tonatih momatki ne capitania tlen Guatemala ininwaya tlatzkis pampa ax kipiaya tomih wan kitemoyaya kanih momanawis; nohia momatki seyok tlamantli tlen axkualli: nopa Cortes ax kintlepanittayaya Tratados de Córdoba. Pa nimah monarquistatlakameh pehkeh mokualaniyah waya tlen kinekiyayah kisewiseh Iturbide.

Nochi owi eliyaya. Motemowihki tlaxtlawalistli wan ika owi motlalanayaya tomih, sekinokeh nohia moihliyayah pampa moxitonkeh ayohkana tlaxtlawaseh yontle, ax

onkayaya tomih. Tlawel monekiyaya tlapalewulistli para kintlaxtlawaseh tekitinih wan tlamokuitlawiyanih, yeka monekiyaya monechikoseh wan kiittaseh kenihkatzah kikualtlaliseh nochi kualantli tlen onkayayah, wan nohkia monekiyaya kiihkuiloseh amatlanawatilli, yeka ika owi mochihi. Iturbide nohkia ax welki kikualtlalia nopa kualantli wan motewihki waya tlanawatiyanih congresistas, wan kiihtoiki ayohkana tekitis. Miyakeh kitlepanittayayah wan ax kinekiyayah ma yowi, yeka nopa sargento Pío Marcha kinihlihi tlawewiyanih Celaya ma yakah moahomanatih ipan yowalli tlen 18 tlen mayo wan ma kuatatzikah “¡Viva Agustín I, tlayekanketl tlen Mexko!”. Nochimew tlakameh wan siwameh kikualittakeh ni tlamantli wan nohkia kiihtoikeh monekiyaya mononotzaseh tlanawatiyanih tlen yaino. Tlanawatiyanih kiihtoikeh kenah wan mosentilihkeh ipan nopa yowalli wan pa nimah kiihtoikeh ya elis tlen tlanawatis.

Insurgentetlakameh republicanos mosisiniyayah wan ax kinekiyayah kiittaseh, ihkatzah kehni Iturbide mosewihki ipan 21 tlen julio, pero ax kipiaya miak chikawalistli ken eliyaya tlanawatihketl tlen regencia. Asiko Mier tlawel kualantok, teipah kemah kimalakankeh ne San Juan de Ulúa, wan pehki mosentiliah waya sekinokeh kemah ax kinittayayah. Tlayekanketl kintzahkih tlen ax kitlepanittayayah, wan teipah mochihi se weyi kualantli ika yaino wan tlanawatiyanih diputados kiihliheh ma kixoxoletza nopa nechikolistli. Wan moxoxoletzki ipan 21 tlen octubre, Iturbide kipatlak ika seyok itokah nacionalnechikolistli instituyente, tlen kiski ipan yaya nechikolistli.

Ni tlamantli wan nohkia pampa onkayaya temahmatilli ipan chinankomeh pampa moihtowayaya Iturbide ayohkana

kualli tlanawatiyaya, wan pampa miak tlawikayaya, nochi yaino kitekiwihki se telpokatl brigadier itokah Antonio López de Santa Anna para moketzas. Ipan 2 tlen diciembre tlen 1822, ipan Veracruz, ax kitlepanittak Iturbide, kiihtohki sampa ma motlali congresonechikolistli wan se republicanonechikolistli tlen tlanawatis. Nopa amatekitl ax miyakeh kikualittakeh, pero kena kikualittakeh nechikolismeh tlen motlatinemiyayah wan masónicas, teipah mosentilihkeh waya tlatewiyanih, wan ipan 2 tlen febrero tlen 1823 kikixtihkeh amatekitl Plan de Casa Mata. Ika yaini kinekiyayah kitlaliseh se yankuik nechikolistli, wan pampa kitlepanittayayah tlanawatiyanih tlen chinankomeh, miyakeh kikualittakeh. Iturbide moihlihki ax onkah kualantli ika ya, yeka sampa kikualtlalki nechikolistli tlen moxoletoyaya. Pero teipah onkak miak kualantli, wan yeka kiihtohki ayohkana tlanawatis ipan 22, wan ipan 11 tlen mayo choltehi waya nochimeh iteixmatkawa wan yahki Italia. Nechikolistli kiihtohki imperio axkanah ipatih, wan nohkia kiihtohki Iturbide ax welis mokuepas ipan nopa tlalli. Ipan se tlanawatilli tlen 1824 moihkuilohki tlan Iturbide kinekiskia mokuepas ma kimiktika.

Nechikolistli tlen político monárquico axkualli elki, wan ipan altepetl ax onkayaya ahkia tlanawatis. Nechikolistli tlen sampa motlalki san ya tlanawatiyaya wan ipan 31 tlen marzo kitokaxtihki se triunvirato kampa itztoyah Pedro Celestino Negrete, Guadalupe Victoria wan Nicolás Bravo inihuantih eliskiah Supremo Poder Ejecutivo. Tlanawatiyanih tlen chinankomeh wan tlatewiyanih ax kintlepanittakeh wan inihuantih kiihtohkeh ma sampa mochiwa se yankuik nechikolistli, ika Plan de Casa Mata.

Centroamérica tlalli, ipan virreinal kawitl iselti monawatiyaya, wan kehnopa elki teipah, pero Guadalajara, Oaxaca, Yucatán wan Zacatecas kiihtohkeh inihuantih axaka kinnawatis, nesiyya nochi moxolewas. Tlanawatiyanih kitokaxtihkeh Lucas Alamán tlanawatihketl tlen Relaciones, ya ax kinekiyaya ma moxolewa tlalli wan yeka kintitlanki miyakeh tlatewiyanih ma yakah ipan Guadalajara pampa nepa ax kinekiyaya tlatlepanittaseh. Tlanawatiyanih tlen nikah wan tlen Zacatecas kiihtohkeh kena tlatlepanittaseh pero monekiyaya se yankuik nechikolistli tlen federación. Tlanawatiyanih ax kinekiyaya kichiwaseh yaino, pero motemahmatiyayah pampa moihliyayah moxolewas nopa tlalli ken virreinos meridionales, wan ihkino mokuanehnemilihkeh wan kiihtohkeh kena mosentiliseh wan kichiwaseh se constituyentenechikolistli.

Tlen yankuik nechikolistli pehki tekiti ipan noviembre tlen 1823 nopayo kalaktoyah miyakeh federalistatlakameh. Kehnopa ipan se amatlanawatilli tlen 31 tlen enero tlen 1824 moyankuichihki Estados Unidos Mexicanos, wan teipah ika miak sanilistli, ipan septiembre kikualtlalihkeh amatlahkuilolli tlen Amatlanawatilli tlen 1824, tlen nochimeh kitlepanittakeh ipan octubre. Nopayo moihkuilohki onkas se república representativa, tlen chinankomeh wan altepemeh kampa eltoseh 19 estados, nawi tlalli wan se Distrito Federal; tlaneltokilli tlen Estado elis católica, ax onkas seyok, wan nochi tlanawatilli moxolewas ipan eyi pamitl, tlen tlayekanas elis tlen legislativo. Ejecutivo mokahki ininmakoh ne tlanawatihketl wan vicepresidente, wan tlen judicial mokahki ininmakoh tlen tribunales wan se Suprema Corte de Justicia. Mokahki kenihkatzah kintlaliseh tlanawatiyanih iwikal ken

kaxtiltlanawatilli. Nopa tlamantli kiihtosneki nochimeh tlakameh kintlaliyayah ahkia inihuantih tlanawatiseh. Tlayekanketl tlen república kitlaliyayah legislaturas estatales. Ni tlanawatilli mokualtlalki se kentzih ken tlen Estados Unidos, pero tlen nel ipatih elki tlen 1812.

Chinankomeh kiihtohkeh nopa mexkofederalismo ma mochiwa ika chikawalistli ken tlen norteamericano, pampa federaltlanawatiyanih ax weliyaya nel kinnawatis nochimeh tlakameh wan siwameh. Kena tlanawatiyaya sekinok tlamantli ken tlawikalistli, tlen kenihkatzah momanawiseh wan kualli tekitiseh waya sekinokeh altepemeh, para welis mochiwas yaino kinnawatis estados ma tlaxtlawakah se kentzih —san se ome tlaxtlahkeh—, nohkia kitlalanas tomih tlen aduanas wan tlen seyok kampa ax onkayaya miak tomih.

Nopa tlanawatilli tlen ejecutivo kinpalewihki ne exinsurgentetlakameh Guadalupe Victoria wan Nicolás Bravo pampa asitoh presidencia wan vicepresidencia. Ika pakilistli kinmakakeh kuatopilli, pampa nochimeh moihtliyah kualli tekitiseh wan motlalanas altepetl. Pero nohkia onkayaya miak kualantli ipan altepetl: miak tlawikayaya, ax tekitiyayah san sehko, monekiyaya tomih wan kitlepanittaseh sekinokeh altepemeh. Nopa imperio san kitlepanittayayah Gran Colombia, Perú, Chile wan Estados Unidos, pero poliwiyaya tlatlepanittalistli tlen Gran Bretaña, pampa ya kipiaya miak tomih wan chikawalistli, wan kipalewiskia tlan sampa kinekiskia kitewiseh wan kimapachoseh. Wan Gran Bretaña ya kinekiyaya tomih tlen plata wan mexkotlanamakalistli, ipan 1825 kiihtohki kena nel kitlepanittas wan ipan 1826 kiwasanki se amatl kampa moihtliyah kualli mowikaseh wan motlakowiliseh wan motlanamakaseh. Achtowi ken

mochihki ni tlamantli inglestomiahkokuiyanih kitlanetihkeh tomih ome weltah. Nopa tomih motekiwihki para ma kualli tekitikah tlanawatiyanih wan para kintotokaseh kaxtiltekameh tlen nohka itztoyah ipan San Juan de Ulúa, pampa san nopayo itztoyah se keske. Teipah altepetl ax welki tlaxtlahki nopa tomih tlen kitlanetihke, wan teipah ya tlaxtlahki miak intereses, ayohkana kitlanetihkeh wan tlanawatiyanih monekiyaya tlaxtlawaseh teipah.

Kemah mochihi independencia welki mochiwa nohkia tlanamakalistli wan pehki asikoh europeotlanamakanih wan norteamericanotlanamakanih. Ax weliyaya mochiwa tlanamakalistli ipan achtowi xiwimeh pampa ax onkayaya tomih, axkualli ohtli onkayayah, tlachtekinih nehnemiyayah, arrierohlakameh patiyi tlaniyayah wan ax onkayaya se kualli moneda. Iturbide kikixtihki amamoneda, pero ax patiyi elki teipah wan wetzki. Kehnopa, teipah mopatlak ika libranzas wan kualli motekiwiyayah. Ipan 1829 pehki motekiwia tomih moneda tlen cobre para mochiwas tlanamakalistli, pero teipah tlachtekinih nohkia kinchichihkeh tlen axkualli, yeka sampa kinkixtihkeh ipan 1841, ika yaino miak tomih kipolki ne hacienda pública.

Ax wahahki miyakeh kiihtohkeh tlanamakalistli axkualli eltok pampa onkayayah miak kualantli, wan nopa industrialización tlen petoyaya ipan xviii xiwilpilli nohkia axkanah kualli yowiyaya. Ihkatza kehni eltoya, asiyayah wehweyi paquebotes tlen miyak tlamantli kiwalikayayah tlen Europa wan Estados Unidos, yaini kentzih kiyolchikahki tlanamakalistli. Británicotlakameh ax wahahkeh inihuantih tlanawatiyayah tlen tlanamakalistli tlen manta, hilazas, teposmeh wan miak tlamantli, wan francéstlanamakanih

inihuanth tlanamakayayah tlamantli tlen kitekiwiyayah ricotlakameh. Ipan tlanawatilli tlen tlanamakalistli moihkuilohki san mexkoewanih tlanamakaseh tlen pilkentzih, pero ax welki mochiwa ma ax kalakikah francestlakameh wan kaxtilantlakameh, yeka onkak miak kualantli wan tlanawatiyanih kiihtohkeh ayohkana kualli ni tlawatilli ipan 1842. Nohkia onkak kualantli waya tlanawatiyanih, pampa sekinokeh tlanamakanih nohkia eliyayah consultlanawatiyanih so vicecónsultlanawatiyanih ipan ininaltepeh, wan tlawel mokalakiyayah, ni panoyaya ipan Veracruz wan Tampico, pampa inihuntih kinekiyayah kitlaniseh miak tomih. Tlamantli tlen kinamakayayah mexkotlanamakanih eliyaya plata, wan nohkia palo de tinte, añil, vainilla, cochinitilla, henequén wan tzopelik tlen owatl. Nochi ni tlanamakalistli mochiwayaya ipan Veracruz, Tampico, Matamoros, Campeche, Sisal, Mazatlán, Guaymas wan San Blas, wan owi eliyaya pampa nohkia tlachtekiyaya. Sekih ohtli tlen ipan norte, tlen Santa Fe, Chihuahua wan Texas waya Estados Unidos, nel kualli eliyayah pampa yehyektzih mochiwayaya nochi tlanamakalistli, se tlamantli tlen axkualli elki ne vecino tlen norte ya teipah melawak kinekiskia kikixtilis itomih wan itlal.

Ihkatzah onkayaya miak kualantli wan ax onkayaya tomih, tlaihlamikilistli tlen Iustre novohispano, nochi tlamantli tlen pehki kemah kipanextihki iamoch Alejandro de Humboldt wan nohkia ika mexkoplata welki mochihi ma asi tomih tlen británicotlakameh wan alemantlakameh para mochiwas minatekitl. Ihkatzah asiyaya tomih wan kalakiko tepostli tlen máquina de vapor, ax welki motlalana tlanamakalistli, san tlahko eltoya. San ipan Zacatecas kena

nochi kualli yowiyaya, para moyolchikahki minatekitl ika owi elki, ihkatzah nochi yaino panoyaya welki kinamaka 15 millones tlen pesos tlen plata ipan se xiwitl, wan seyok kentzih tlen tlachtekilistli.

Tlaltekitl nohkia axkualli eltoya pampa ax onkayayah tekitinih, tlachtekiyayah wan patiyoy eliyaya transporte, yeka nohkia wahahki motlalanki. Haciendameh eltoyayah ininmakoh tlen criollotlakameh wan ininaxkah kichiwayayah nohkia seyok tekitl wan kehnopa kitlaniseh tomih tlen ika mopalewiseh. Onkayaya nohkia azúcar tlen owatl, kafe so henequén tlen kinamakayaya, yeka weyi haciendameh kalakiyayah ipan inintlal tlen masewalchinankomeh, yaino kichihki ma onkah tlatewilistli.

Nohkia ax welki mochiwa ferrocarriltemiktli pampa ax onkayaya tomih, wan monekiyaya mochiwas yaino wan kehnopa ayohkana patiyoy elis transporte, san 18 kilómetros tlen teposohitli mochihki. Monekiyaya mochiwas se flotatlanamakanih wan nohkia ax mochihki; san yucatekotlakameh inihuntih kena kipiayah se kuekuetzih flota tlen ika tlanamakayayah. Políticayolistli nohkia kipiaya miak kualantli wan axkanah moyolchikahki pampa onkayaya faccionalismotlahlamikilistli tlen kichiwayayah logias masónicas wan tlahtolli tlen tlatewiyanih, kehnopa tlanki tlatlepanittalistli, welis moihtos san tlatewilistli tlen ipan 1832 wan 1854 kisemoyahkeh miak kualantli. Nopa logia escocesa tlen kikalakihkeh kaxtiltlatewiyanih, mosemoyatoyaya ipan ricotlakameh, yeka radiltlakameh kichihkeh seyok tlen yankuik. Tlayekanketl Victoria kikualittak pampa kitemoyaya “equilibrio” wan ministro norteamericano Joel R. Poinsett kiwikak ipan Estados

Unidos. Ni logia moixmatiyaya ken yorquina, nohkia ax kinkualittayayah kaxtiltekameh, pampa nopayo kalaktoyah iknotlakameh wan tlen moyolchikahki kemah kiixpantihkeh padre Joaquín Arenas pampa kinekiyaya sampa ma onkah kolonialyotl tlahlamikilistli. Ni tlamantli kichihki ma motewikah masontlakameh, tlanawatiyanih tlawel mosisinihkeh wan tlanawatihketl Bravo kiihtohki ipan 1827 nopa logias ma tlamikah wan nohkia ma axkanah mokalaki nopa ministro Poinsett. Teipah kitlanihkeh Bravo wan kitotokakeh, yeka motlalanki yorquinotlahlamikilistli wan mochihki tlanawatilli para kintotokaseh nochimeh kaxtiltekameh.

Nopa kawitl eliyaya tlawel owi, ipan 1828 onkak tlasentilistli para mopatlas tlanawatihketl wan Mexko ax kualli kichihki nopa tekintl. Nopa voto tlen legislaturas kipelewiyyaya Manuel Gómez Pedraza, pero Santa Anna tlen ipan nopa kawitl itztoya ipan Veracruz ya kiihtohki kimanawis Guerrero. Ipan Mexko altepetl moahomankeh sekinokeh tlen kinekiyayah ma onkah tlatewilistli, Pedraza ayohkana tekutihki. Nechikolistli ax kipiaya ahkia kiyekanas, ihkino kiihtohki Guerrero elis tlanawatihketl wan Anastasio Bustamante elis vicepresidente.

Ika owi tlanawatihkeh wan ax wahahkeh, wan hacienda mikiyaya, Guerrero kena kintotokak kaxtiltekameh wan tlatewihki waya Isidro Barradas. Tlatewiyanih Mier y Terán wan Santa Anna kitlanihkeh. Nohkia mochihki se tlanawatilli kampa moiukuilohtoya ma tlami nopa esclavitud, wan nochi yaino nohkia kipalewihki. Ipan diciembre tlen 1829, reservatlatewiyanih tlen itztoyah ipan Jalapa para tlapalewiseh ipan tlatewilistli ax kitlepanittakeh Guerrero,

wan ipan enero tlen 1830, nopa vicepresidente Bustamente ya elki tlanawatihketl, wan Alamán elki secretario de Relaciones Exteriores.

Tlayekanketl Bustamante kualli tekutihki kinekiyaya ma ayohkana onkah militartlatewilistli, mokualtlalis hacienda pública, kitlaxtlawiliseh itomih británikotlakameh wan onkas tomih. Alamán kikualtlalki nochi ipan hacienda pública wan kiittak kenihki tlaxtlawas nochi tlen kintlawikiliyayah altepemeh, kinekiyaya ma onkah tomih ipan altepetl wan ma mochiya tekittl tlen industrialización. Kichihki Banco de Avío wan kikohki textilttepostli, ichkaxinachmeh, cabras wan tlen kualli vicunas. Kualli tekitiyaya wan tlahlamikiyaya wan nochi yaino nesiyaya ipan periódicos ken El Mercurio, yeka teipah onkak kalmeh kampa kichiwayaya textilttekitl, ipan tlahko xiwilpilli motlalanki nopa tekittl, pero ax weliyaya kitlani inglesestlakameh itekih.

Ihkatzah kikualittayayah iteki tlen Alamán, sekinokeh achi kimawiliyayah pampa kinmiktihki tlen waya motewihki ipan sekih estados, yeka estadotlanawatiyaneh motemahmatiyayah pampa kichiwas yaino wan pampa san ya kinekis tlanawatis. Más motemahmatiyayah wan kualaniyayah pampa kinmiktihkeh tlatewihketl Guerrero wan sekinokeh radicaltlakameh ipan 1831. Santa Anna kinekiyaya elis tlanawatihketl, wan yeka kitekiwihki nochi kualantli tlen onkayaya para kichiwas yaino ipan enero tlen 1832, wan pehki se weyi tlatewilistli tlen tlawel patiyó kiski, tlanawatiyaneh kitlalanilihkeh tomih iglesia, kikalakihkeh aduanas ipan hipoteca wan kitlalihkeh nohkia ipan renta tomikalli wan istakalli, kehni tlanawatiyaneh miak tlawikatoh teipah wan ika owi tekitiyayah, san tlahko tekitiyayah.

Santa Anna mopalewihki ika nechikolistlatewiyanih wan tomih tlen kisayaya ipan aduanas tlen Veracruz wan Tampico, kintlanki Bustamente wan tlatewiyanih. Estadomeh kiihtohkeh kena kipalewihseh pero monekiyaya mokuemas Gómez Pedraza wan kitlamiltis iteki tlen tlanawatihketl. Ipan 1833 sampa onkah tlasentilistli wan nopayo tlatlankeh Santa Anna wan Valentín Gómez Farías, ihkatzah tlanawatiyanih ax tlamatiyayah. Santa Anna ahachika yowiyaya tekiti ipan ihacienda wan nohkia tlatewiyaya para ma ax onkah nopa “religi6n wan fueros”, nopa mopewaltih waya gobernadortlanawatiyanih tlen Michoac6n wan Estado de M6xico, yeka ipan se xiwitl tlanawatihki vicepresidente Gómez Farías.

Radicaltlakameh kinekiyayah kitlaliseh nopa reforma liberal, wan moihlihkeh welis mochiwas tlan kintzakuaseh wan kintotokaseh nochimeh tlen axkanah waya mowikayayah, kikixtihkeh se amatl kampa eltoyah inintokah. Ipan octubre tlen 1833, onkayaya kokolistli c6lera, nechikolistlanawatiyanih kichiwayayah tlanawatilli tlen ax kikualittak iglesia. Ayohkana motekiwiskia fuerza p6blica para motlalanas tlaxtlawilli tlen diezmos wan votos mon6sticos; ma sampa onkah curatos vacantes tlen tlanawatiyanih; motzahki Weyikaltlamachtilyan, wan onkas laicidad ipan kaltlamachtilyan. Gómez Farías kiihtohki ma sampa onkah nopa curatos, pero nechikolistlanawatiyanih kiihtohkeh axkanah wan kintotokakeh obispos tlen ax kitlepanittayayah tlanawatilli. Ika nopa tlanawatilli tlakameh wan siwameh mosisinihkeh wan teipah onkak miak kualantli.

Santa Anna kikualittayaya Religiosotlanawatilli, pero kemah nechikolistlanawatiyanih pehki mononotza kenihki sampa kikualtlaliseh nechikolistlatewiyanih, ya moitzkihki

tlen yanopa wan nohkia pampa nochimeh tlakameh mosisintoyah, wan sampa elki tlanawatihketl. Nopa general kintokaxtik ahkia inihuantih tlanawatiseh wan kiihtohki ax onkas reformas, san kena onkas tlaxtlawilli tlen diezmos pampa ika yanopa mopalewiyayah hacendadotlakameh.

Desde ipan 1829 axaka kitlepanittayayah amatlanawatilli. Nechikolistlanawatiyanih nohkia kiixpanotoyayah miak weltah, ejecutivotlanawatiyanih nohkia axkualli tekitiyayah wan nochi axkualli eltoya; tlawel monekiyaya se yankuik amatlanawatilli. Ipan 1835 cheneh nochi eltoya, wan colonos texanos kinekiyayah moxitomaseh, federal nechikolistlanawatiyanih kikualtlalki se tlanawatilli para mokuekuetzih chiwas milicia cívica. Estadomeh tlen Zacatecas wan Coahuila, wan Texas moihlihkeh ax kitlepanittaseh nopa tlanawatilli wan ministro tlen Relaciones Exteriores, José María Gutiérrez de Estrada, mononotzki waya zacatecatlanawatiyanih para kinihlis kena monekiyaya nochimeh kitlepanittaseh amatlanawatilli. Zacatecas kiihtohki ax tlatlepanittas wan tlatewis, pero kemah asitoh nechikolistlatewiyanih tlen comandante, nopa gobernador cholohki, wan ika yaino ax onkak tlatewilistli. Nochi tlamantli tlen panok kikualittayayah nochimeh tlen ax kinekiyayah ma mochiwa federalismo.

PAMPA ONKAYAYAH AMENAZAS
EXTRANJERAS MOYEHYEKOHKI CENTRALISMO
WAN DICTADURA

Pampa zacatecatlanawatiyanih ax kitlepanittayayah tlanawatilli wan pampa Texas kinekiyaya moxitomas,

nesiyaya nopa federalismo kixolewayaya nacionaltlalli. Ihkatzah nechikolistlanawatiyanih tlen 1834 pehki mononotzah kenihkatzah moyankuilis amatlanawatilli, monehki kinkakis nochimeh wan mopatlas ika se nechikolisconstituyente wan elis “iwikal ken inihuantih wan tlen kinekih”. Yeka legisladortlanawatiyanih pehkeh kiihkuilowah se yankuik amatlanawatilli, kemah Santa Anna yowiyaya Texas. Diputadotlanawatiyanih momachtihkeh nochi tlen “axkualli kichihkeh” ipan achtowi tlanawatilli wan mokuanehnemiliyayah kenihki kikualtlaliseh.

Nopa Chikome Tlanawatilli, elki tlen achtowi centralista amatlanawatilli, mochihi ipan diciembre tlen 1836. Federalistatlakameh kiihtohkeh eliyaya conservadora, tlen cuño liberal, pampa nohka onkayaya tlanawatiyanih wan eyi pamitl, wan kikalakihkeh tlen nawi pamitl, itokah Poder Conservador, tlen kintlamokuitlawis nochimeh. Miyakeh moihliyayah axkualli tlen yankuik tlanawatilli . Yeka motlalki voto censitario, iwikal ken sekinokeh altepemeh, ni kiihtosneki tlavotaryayah wan kinvotaryayah san tlen tlaxtlawayayah impuestos wan kipiayah kalmeh wan tlalli. Nochi mochiwayaya iwikal ken achtowi. Estadomeh mopatlakeh ika departamentos wan ayohkana welkeh moxolewah, goberdanortlanawatiyanih kintlaliyayah nacional ejecutivotlanawatiyanih. Estatal nechikolistlanawatiyanih mopatlakeh ika juntas departamentales tlen kipiayah san chikome diputadotlanawatiyanih wan ayuntamientos sampa elihkeh san tlen onkayayah ipan 1808, wan nohkia tlen masewalchinankomeh kampa ewayayah 8 000 tlakameh wan kampa onkayayah 4 000 puertos. Kenihki motlalis tlanawatihketl elki más owi, pampa moihtohki ne Senado

wan ne Suprema Corte de Justicia ma kipanextikah eyi tlakameh, wan Cámara de Diputados sampa san eyi kinitzkis wan kintitlanis ipan juntas departamentales; nochimeh votos kintlepanittaskia Cámara de Diputados, wan tlayekanketl kiihtoskia ahkia tlatlanki. Nohkia mochikawaltihki hacienda pública para kipalewis nacionaltlanawatiyanih, pero ihkatzah presidencial kawitl moweyichihki chikueyi xiwitl wan tlanki vicepresidencia, ejecutivo nechikolistlanawatiyanih ax weliyaya moyolchikawa pampa Poder Conservador, Congreso wan Consejo de Gobierno inihuantih kinawatiyayah. Ihkatza nopa Chikome Tlanawatilli mochihki kemah onkak kualantli tlen Texas, mexkoewanih, tlen nochipa tlaneltokayayah, kisewihkeh ne tlatewihketl Anastasio Bustamante, moihliyayah ya kualli tlanawatis wan “mopewaltis se yankuik wan yehyektzih kawitl”.

Tlen axkanah tlamatiyayah kiihtowayayah ne centralismo kipiaya tlatlakolli pampa Texas moxitonki, pero nopa panok pampa kalahkeh colonotlakameh tlen Estados Unidos, wan nopa altepetl kinekiyaya kikowas nopa tlalli, kehnopa kiitohwaltiwalowayaya ministro Poinsett ipan 1825. Kaxtilcorona tlanawatihki ma kalakikah colonos angloamericanotlakameh, mokuesowayaya pampa kinekiyaya kinmapalewis tlakameh tlen Luisiana wan las Floridas —tlen kinpoltoyah—, yeka kinilihki ma yakah Texas. Kemah Mexko moxitonki, tlanawatiyanih kiihtohkeh ma kehnopa eltok, kinekiyaya ma onkah tlakameh ipan Septentrión. San monekiyaya nopa colonos angloamericanotlakameh ma elikah católicos, wan ya miak tlamantli kinmakak para kualli itztoseh. Kinmakakeh miak tlalli “tomichiwanih”, wan inihuantih kiihtohkeh kinkalakiseh miyakeh colontlakameh

tlen kena tlatlepanittaseh wan nohkia kinmakaseh tlalli, tomichiwanih san kentzih tlaxtlawaskiah. Estado tlen Coahuila wan Texas inihuantih kitlalanayayah nopa tomih tlen tlaxtlawayayah. Pero nopa frontera eliyaya tlawel weyi wan ax weliyayah kitlamokuitlawiseh wan nohkia pampa wahka itztoyah wan ax kipiayah tomih, yeka kalahkeh miyakeh kintlepanittayayah wan esclavistatlakameh, ipan colonias axaka kintlepanittayayah tlanawatilmeh.

Nelia nopa Constituyente nechikolistlanawatiyanih tlen 1824, kemah kichihki ma mosehotilikah Texas wan Coahuila, kichihki ma onkah miak kualantli, pero ipan 1834 tlantoyayah. Tlen nel nelia kichiwayayah nopa kualantli eliyayah esclavitud wan pampa motlaltoyah aduanas, kemah tlanki kawitl para ax onkas. Desde kemah mochiwayaya estadotlanawatilli, nopa anglosajóntomichihketl Esteban Austin kiniliyayah diputadotlanawatiyanih ax kualli tlamis esclavitud, pampa kanih kikuisseh tomih ininaxkameh para tlaxtlawaseh “nochi tlen kipiayah”. Yeka ipan Amatlanawatilli tlen 1827 san moihkuilohki “ipan estado axaka esclavo tlakati”. Ipan 1829, Guerrero kiihtohki tlamis esclavitud ipan Mexko, san ipan Texas axkanah, pero monekiyaya ayohkana kiwalikaseh yon se esclavo. Colontlakameh achi motemahmatiyayah pampa inihuantih ax kinekiyayah ma tlami nopa esclavitud.

Ihkatzah nochi yaino mochihki, elki tlanawatilli tlen colonización tlen 1830, kampa moihkuilohtoya ayohkana kinwalikaseh angloamericanotlakameh, pehki onkah miak kualantli ika yaino, wan nohkia pampa motlapohki se aduana ipan 1832. Ipan villa tlen Anáhuac miak kualantli onkak wan yeka motlalki se tlasentilistli tlen angloamericanotlakameh.

Wan nopa anexionistas especuladortlakameh, kemah tlamiskia sempoalli xiwimeh, kitekiwihkeh “nopa ax tlatlepanittalistli” para ma mosisinikah kualli colontlakameh. Ipan segunda tlasentilistli moihtohki ne Austin ma yowi Mexko wan ma kiwihak se amatl kampa onkah tlanawatilli. Austin kipiaya iwampoyowah tlen radical diputadotlanawatiyanih tlen 1833, yeka kichihki ma sampa kinwalikakah angloamericanotlakameh, ma onkah más kawitl para moxitlawaseh wan Coahuila ma kichiwah tlanawatilli kampa itztoseh texatlakameh, ma motekiwi ingléslahtolli ipan nochi amatl wan ma onkah juicio por jurado, nopa kiihtosneki onkas tribunales kampa kinixpantiseh tlen ax kitlepanittayayah tlanawatilli.

Ipan 1835 sampa motlapohki aduana, kemah tlanki kawitl para ax onkas, wan sampa onkak kualantli. Nopa militartlanawatihketl ax welki kikualtlalia nochi tlen ax kualli eltoya wan anexionistatlakameh sampa kintemahmatihkeh colontlakameh pampa kinihliyayah ax kualli nopa antiesclavimo wan ma moxitomakah. Colontlakameh kinekiyayah moyolchikawaseh wan yeka kinnonotzkeh norteamericanotlakameh ma mopalewikah. Yeka ipan Estados Unidos mochihkeh miak nechikolistli kampa mosentiliyayah tlakameh tlen kinekiyayah tlatewiseh wan nohia motlalanayaya tomih wan teposmeh tlen ika tlatewiseh. Tlayekanketl Andrew Jackson, ya kiihtohki “axkanah mokalakis” ipan nopa mexkokualantli, pero ax kitlepanittak yaino.

Nechikolistlanawatiyanih kintitlanihkeh tlatewiyanih para ma kimapachokah texanatlatewilistli, tlayekanayaya tlatewihketl Santa Anna. Tlatewiyanih ax kipiayah tomih wan

ax kualli monechikohtoyah, kehnopa pehkeh tlatewiyah wan tlatlankeh ipan fuerte del Álamo. Ihkatzah yaino panoyaya, nopa texanotlakameh nohkia kiihtowayayah inihuantih moxitonkeh ya ipan 6 tlen marzo tlen 1836 wan kitlalihkeh se provisionaltlanawatilli kampa kitokaxtihkeh se mexkotlakatl itokah Lorenzo de Zavala ya elis vicepresidente. Santa Anna pehki kintewiyah peroh teipah kiitzkihkeh. Tlen segundo tlanawatihketl, ne Vicente Filísola, kiihlihki nopa tlen kitzaktoya ma kinwikah tlatewiyanih hasta kampa eltoya nopa Weyi atemitl (tlen teipah elki Bravo), ihkino welki moxitonki Texas wan elki frontera kampa tlamiyaya departamento. Ax onkayaya tomih para sampa kintitlaniseh tlatewiyanih, teipah nopa nechikolistlanawatiyanih tlawel mokuesowayaya wan san nopa tlamantli kiihlamikiyaya, kinekiyaya sampa tlanawatis ipan Texas, tlen britanicotlanawatiwanih kiihliyayah ma kitlepanitta nopa independencia, pampa tlan kichiwas yaino ayohkana mokuesos wan ayohkana kipolos tomih.

Nopa centralismo ax welki kichiwa nochi tlen kiihtohki. Pampa kemah onpehki, kitzahkeh ayuntamientos wan nochimeh tlakameh wan siwameh monekiyaya sampa tlaxtlawaseh (capacitación) yeka onkak tlatewilistli ipan chinankomeh wan federalistatlatewilistli ipan norte. Ihkino nopa centralistatekitl ax kualli elki pampa onkak miak kualantli, ax onkayaya tomih wan miyakeh ayohkana kineltokayayah ipan nopa xiwilpilli. Yeka pehkeh kalakiah extranjerotlakameh tlen kinekiyayah tlatewiseh pampa kiihtowayayah mexkotlanawatiyanih ax kintlaxtlawiyayah tlen kintlawikiliyayah. Pero nopa extranjerotlakameh san tlakakawayayah, teipah nochi momatki pampa kinchiwilihkeh arbitraje ne norteamericanotlakameh,

wan tlaxtlawalistli mokahki san 15%. Ipan 1838 Francia nohkia kiitzkihki nopa tlamantli wan pehki tlatzakuilia wan kintewiya Veracruz wan Tampico, wan altepetl sampa monehki kitlaxtlawas miak tomih.

Ax onkayaya tomih wan yeka nechikolistlanawatiyanih kitlalihkeh se tlaxtlawalistli tlen 15% ne tlamantli tlen kalteno walayayah, yaini kichihki miyakeh extranjerotlanamakanih wan mexkotlanamakanih ma kipolokah miak tomih. Ihkino, kemah tlamiskia tlen achtowi presidencialkawitl, sekih kinekiyayah ma nochi mokualtlali wan kiihtowayayah monekiyaya se monarquía, “ika se extranjerotlanawatihketl”, noso ipan militartlanawatilli. José María Gutiérrez de Estrada kiittak kinekiyayah kichiwaseh tlen último, yeka kiihtohki ma motlali se monárquicatlanawatilli. Tlatewiyanih tlapalewihkeh para onkah dictaduratlanawatilli. Ipan 1841, extranjerotlanamakanih kinihlihkeh Antonio López de Santa Anna, Mariano Paredes wan Gabriel Valencia ma kitlepanittakah yaino, wan ipan octubre pehki dictaduratlanawatilli tlen kiyekanayaya Santa Anna. Federalistatlakameh nohkia kikualittayayah dictaduratlanawatilli san kinekiyayah ma onkah se constitucionalnechikolistli. Santa Anna kichihki wan federalistatlakameh tlatlankeh, wan kehnopa elki. Ipan diciembre tlen 1842 nechikolistlanawatiyanih kixoxoletzkeh wan kipatlakeh ika se notablesnechikolistli tlen kiihkuilohkeh Bases Orgánicas. Ipan yankuik centralistatlanawatilli ayohkana onkayaya Conservadortlanawatilli, kichikawaltihki ejecutivo wan kichihki nohkia miak nechikolistli tlen itokah asambleas legislativas. Nochi yaini ax welki mochiwa pampa nel nelia ax onkayaya tomih.

Ipan 1843 kemah mosentilihkeh wan kemah onkayayah Bases Orgánicas, Santa Anna elki tlayekanketl, ipan nechikolistlanawatiyanih kalaktoyah federalistatlanawatiyanih tlen kiihliyayah ma kualli tlanawati. Yeka kemah kin ehki kixoxoletzas ipan 1844, nechikolistlanawatiyanih mosisinihkeh wan ipan 5 tlen diciembre tlen 1844 kikixtilihkeh kuatopilli, mopalewihkeh poder judicial, ayuntamiento wan altepeiknotlakameh. Pampa panok yaino, se tlakatl itokah José Joaquín de Herrera ya elki tlanawatihketl, nochi mochihki ika tlanawatilli. Herrera kitlalki se nechikolistli kampa kalaktoyah kualli federalistatlanawatiyanih wan kin ek iyaya kichiwas se nel kualli nechikolistlanawatiyanih wan ma ayohkana onkah kualantli. Tlen moderadostlanawatiyanih kiittakeh owi tlan kin ek iskiah tlatewihseh yekah kiihtohkeh san mononotzaseh tlen independencia tlen Texas.

Pero ipan nopa altepetl wan ipan nochimeh altepemeh nohkia onkayaya miak kualantli. Mexko kin ek iyayah kitewihseh Estados Unidos wan Kaxtillan, ya kin ek iyaya sampa tlakualanchiwas wan kitlalis monarquíatlanawatilli ipan altepetl, kipalewiyayah Francia wan Gran Bretaña. Nopa tlamantli kikualtlalki se kaxtiltlakatl itokah Salvador Bermúdez de Castro, ipan nopa tek itl nohkia kalahtoyah ricotlakameh, ken ne Alamán.

Altepetl eliyaya kualantla. Ipan 1840 Mexko nohka kuekuetzih eliyaya wan ivecino tlawel weyi mochihtoya. Norteamericanotlakameh eliyayah 20 millones, wan ipan Mexko onkayayah san chikome yeka ax weliyaya kitlani nopa altepetl pampa ya kipiayah miyakeh tlakameh wan tomih. Seyok kualantli onkak, pampa mexkotlanawatiyanih wahahkeh mononotzkeh tlen independencia wan, ipan junio

tlen 1845, Texas mosehotilihki waya Estados Unidos, yaino tlamantli kiitzkihkeh radicales federalistlanawatiyanih para kitlateihliseh Herrera ya kinekiyaya kinamakas nopa tlalli wan nohkia tlen California, ihkatzah axkanah melawak.

Pampa nochi yaino panoyaya, monarquistatlakameh monechkawitoh waya tlatewihketl Mariano Paredes y Arrillaga, ya kiyekanayaya reservanechikolistli, tlen kitekiwihki para elis tlanawatihketl. Paredes tlawel kualli tlatewiyyaya wan yeka kitlepanittayayah tlanawatiyanih wan kimakayayah tomih, pampa moihliyayah ya nel kualli tlatewia ipan norte. Kemah kinawatihkeh ma yowi kampa frontera, ya ax tlakahki wan kiihtohki ax kitlepanitta Herrera wan yahki tlatewito ipan altepetl pampa kinekiyaya tlanawatis. Tlatlanki, pero teipah idictaduratlanawatilli nel sehki, pampa axkualli kichihki iteki, ax kintewihki tlachtekiyanih, ax kikualtlalki hacienda wan ax kichikawaltihki tlatewilistli. Kehnopa pehki se federalistatlatewilistli ipan Guadalajara, nohkia ipan nopa kawitl norteamericanotlatewiyanih nehnemiyayah ipan Mexko tlalli. Pero paredes kintitlanki tlatewiyanih ma yakah kintewitih federalistatlatewiyanih.

Paredes ax kinekiyaya ma onkah tlatewilistli, pero tlanawatihketl James Polk tlawel kinekiyaya kikowas California. Polk nohkia ax kinekiyaya ma onkah tlatewilistli; yeka ipan Habana kimakak tomih ne Santa Anna wan kinehki kikowas nopa tlalli. Kemah tlamiyaya 1845, se tlakatl tlen kinawatihtoya Polk yahki altepetl pampa kinekiyaya tlakowas pero ax kiselihkeh. Kemah Polk kimatki tlen panok kiilihki tlatewihketl Zachary Taylor ma yowi kampa eltok Weyi atemitl, ni kiihtosneki, ipan mexko tlalli, kampa

mokikixtiliyayah tlalli. Kemah kimatki onkak se kualantli ipan marzo, Polk kiihtohki onkas se weyi tlatewilstli ipan 12 tlen mayo tlen 1846, kiihtohki Mexko kipiaya tlatlakolli pampa “kitoyahki norteamericana estli ipan norteamericano tlalli”, nochi yaino axkanah melawak eliyaya.

Ipan nopa kawitl, mexkotlatewiyanih kipoltoyayah se ome tlatewilstli, ipan 8 wan 9 tlen mayo. Nochimeh ax kineltokayayah nopa tlamantli wan kiihtohkeh ayohkana kitlepanittaseh Paredes yon centralismo. Ihkatzah ipan ni kawitl onkayaya tlatewilstli, ipan 4 tlen agosto kiski se federalistlanawatilli tlen ax kitlepanittayaya Paredes wan sampa kitlaliyaya Amatlanawatilli tlen 1824, pampa panok nochi yaini axkualli mosenkahkeh kenihkatzah momanawiseh. Pampa sampa onkayaya federalistlanawatilli nopa nechikolistlanawatiyanih moyolpitzahki wan iselti tlatewiyaya; wan nohkia onkayaya miak kualantli ipan ayuntamientos, poderes estatales wan federales, yeka ax kichiwiliyayah kuentah kenihkatzah tlatewiseh.

Kemah pehki nopa tlatewilstli, momatiyaya tlen panos. Mexko axtlen kipiaya: san tepostlatewilstli tlen wahahkia; tlamokuitlawiyanih axkualli momachtihtoyah wan tlatewiyanih nohkia. Ni nechikolistlatewiyanih tlatewiskia waya seyok tlen más kuekueztih, pero inihuantih nel kualli tlatewiyayah wan kipiayah miak tlapalewilstli, yankuik tepostlatewilstli wan nohkia miyakeh tlen kinekiyayah tlapalewiseh para ma tlatlanikah. Nechikolistlatewiyanih tlen Mexko monekiyaya yaseh ipan sur wan ipan norte, Estados Unidos kintewiyaya san kampa weli, wan nohkia atlatewiyanih kitzakuayayah puertos tlen Mexko, kehni ayohkana asiya tomih wan tlapalewilstli tlen aduanas

tlen ika weliskiah mopalewihseh. Pampa san pilkentzih monekiyaya onkas tlaxtlawalistli, tlanamakalistli nohkia moyolchikahki. Yucatán ax kinekiyaya ma kinkixtilika ipuertos, yeka kemah mochiwayaya ni tlatewilistli ya kiihtoiki axkanah mokalakis wan axtlen kichiwas.

Ipan enero tlen 1847, Yankuik Mexko wan California, mosehotilihkeh waya Estados Unidos pampa ax onkayaya ahkia kinmanawis. Norteamericanotlatewiyanih tlatlankeh san kampa weli, ipan norte wan teipah ipan eje tlen Veracruz-Puebla. Mexkotlatewiyanih, axkualli tlakuahtoyah, ax kipiayah teposmeh tlen ika tlatewihseh, tlawel mokuesowayayah, pero ihkatzah kehnopa itztoyah nohka tlatewiyayah. Ipan Monterrey wan Veracruz chikawak tlatewihkeh wan nohkia miyakeh mihkeh, wan ipan Angostura mexkotlatewiyanih ome tonatih tlatewihkeh ika iyolo, teipah cholohkeh wan kehnopa kipolkeh nopa tlatewilistli.

Ipan Veracruz nohkia asikoh tlatewiyanih wan teipah tlatlankeh ipan Puebla, teipah wetzki Mexko altepetl. Teipah kintlanihkeh mexkotlatewiyanih nawi weltas ipan valle tlen Mexko, yeka Santa Anna kinnawatihki ma cholokah para axkanah kinmiktiseh, kemah nochimeh tlakameh wan siwameh kiittakeh panoyaya ni tlamantli kinehkeh tlatewihseh, pero axkanah welkeh wan miyakeh kinmiktihkeh wan onkak estado de sitio. Ipan 14 tlen septiembre tlen 1847, ipan Palacio Nacional patlaniyaya bandera norteamericana.

Ipan seyok tonatih, ipan villa de Guadalupe, Santa Anna kiihtoiki ayohkana tlanawatis, namah tlanawatis Manuel de la Peña y Peña, tlayekanketl tlen Suprema Corte de Justicia, ya kiwikak nechikolistlanawatiyanih ne Querétaro. Radicaletlanawatiyanih wan monarquistatlanawatiyanih

ax kinekiyayah, moderados kitlalkeh congreso wan kinsentilihkeh gobernadores kehnopa achi kualli elki.

Pampa san kampa weli tlatlantoya, Estados Unidos kinekiyaya kitlamokixtilis itlal Mexko. Polk kititlanki ne Nicholas Trist ma kiwika tlahtolli para ayohkana onkas tlatewilistli, pero pampa miak tlatlantoyah norteamericanotlatewiyanih kiihlihki ma mokuropa wan más tlalli ma tlatlani ipan tlanawatilli tlen paz. Trist ayok kimatiyaya tlen kichiwas; pampa ya kena kinekiyaya mononotzas waya mexkotlanawatiyanih: Luis G. Cuevas, Bernardo Couto wan Miguel Atristáin. Pero ne Winfield Scott, weyi tlatewihketl tlen kinnawatiyaya tlatewiyanih tlen yahtoyah Veracruz wan Mexko altepetl, wan nohkia se británicotlanawatihketl kiihlihkeh ma ax kichiwa yaino, Trist ax kichihki tlen kinawatihtoyah wan ika owi pehki mononotza para ayohkana onkas tlatewilistli, sanilistli tlanki ipan 2 tlen febrero tlen 1848 kemah mowasanki amatlanawatilli tlen paz ipan villa de Guadalupe. Trist kinihlihki iteixmatkawa ax kikualittayaya nochi tlen panoyaya wan “ipan conferencias kiihtowayaya tlatewilistli ax parejo eliyaya”. Ipan tlanawatilli, Mexko kiihtowayaya kena kipolki tlahko tlen itlal. Nohkia ipan amatl moihkuilohki onkas se indemnización tlen 15 millones tlen pesos wan motlaxtlawas tomih tlen deuda externa tlen tlalli tlen kipolkeh, pampa nopa tlalli motlatlantoya ipan tlatewilistli. Nopa comisionadotlanawatiyanih welkeh kimanawiyah Baja California wan Tehuantepec wan nohkia kimanawihkeh nochimeh mexkoewanih para ma kipiakah xitlawalistli. Ipan artículo xi, san nopayo kentzih momanawihki Mexko, nopayo moihkuilohtoya Estados Unidos tlamokuitlawis ipan

frontera para ax onkas kualantli waya indios tlen praderas, pero ni tlamantli axkemah mochihki. Kemah monextihki ni amatlanawatilli ipan nechikolistli, De la Peña kiihtohki nopa amatl mowasanki pampa monekiyaya kentzih momanawiseh wan “nopa república ma axkanah miki”.

Ihkatzah onkayaya miak kualantli waya monarquistas wan radicales, tlanawatiyanih kichihkeh se nechikolistli ipan Querétaro kampa kikualittakeh nopa amatlanawatilli ipan mayo. Herrera ya elki yankuik tlanawatihketl, wan ipan junio sampa kitlalki nechikolistlanawatiyanih ipan Mexko altepetl. Herrera kinekiyaya sampa kikualtlalis nochi, pero tlakameh wan siwameh nel mokuesowayayah, monarquistas wan federalistas kinekiyayah tlatewiseh, masewalmeh nohkia kinekiyayah tlatewiseh, ipan Yucatán. Wan axkanah san yaino, masewalmeh nohkia kitewiyayah wan norteamericanotlachtekiyanih nohkia kinekiyayah kikixtiliseh itlal.

Tlen tekitiyayah waya Herrera welkeh kikualtlaliah administración wan kikuekuetzih chihkeh nechikolistlatewiyanih, pero axkanah tlanki kualantli tlen federalistas moderados wan radicales wan monarquistas, wan tlen waya Santa Anna tlatzkitohyah. Nochimeh tlanawatiyanih san motlateihliyayah kenke kipolkeh wan mokualaniyayah, yeka mochihki yankuik nechikolistli. Kehni, ipan 1849 neski conservadornechikolistli, tlen kiyekanayaya Alamán, ya kinkuatopehki federalistatlanawatiyanih ma tlatzkikah wan ma elikah se partido liberal.

Ipan 1851, Herrera kimakak kuatopilli ne Mariano Arista pampa ya tlanawatiskia, pero axkanah wahahki wan teipah kiihtohki ayohkana tlanawatis. Teipah san

kentzih kawitl tlanawatihki nohkia tlayekanketl tlen Suprema Corte de Justicia, wan teipah elki tlanawatihketl Manuel María Lombardini, ipan estados kipehpenayayah ahkia elis tlanawatihketl provisional, ya kiihtoskia ma motlali se nechikolistli. Ipan nopa kawitl nochimeh partidos kiihtowayayah monekiyaya se nechikolistlanawatiyanih tlen kualli. Kehnopa, elki tlanawatihketl ne tlatewihketl Santa Anna, tlen itztoya ipan Colombia pampa nepa kitotokaktoya.

Ipan 20 tlen abril tlen 1853 mokuelpki sampa nopa axkualli veracruzano tlakatl. Ne conservador Alamán kinextilki se amatekitl kampa moihtowayaya moneki se nechikolistli tlen tetik, kampa ax onkas tlanawatiyanih, kiplas se nechikolistlatewiyanih tlen kitlepanittaseh, onkas san se tlaneltokilli wan kipalewis europeo altepemeh. Ne liberal Miguel Lerdo de Tejada ya kinextilki seyok kampa moihtowayaya moneki tomitlanawatilli para momoyawas altepetl. Santa Anna kiihtohki kiitzkis amatekitl conservador tlen Alamán, tlen waya tekitihki teipah, pero nohkia kitlalanki itlahlamikilis tlen iwampo Lerdo, ya kitokaxtihki weyi oficial tlen yankuik Ministerio de Fomento, Colonización, Industria y Comercio.

Santa Anna axkualli tlanawatiyaya wan kitotokak ne expresidente Arista. Wan pampa conservadores moihtowayayah ika nopa dictaduratlanawatilli weliskiah kitlaliseh monarquía, pehkeh kitemowah se monarca, pero axkanah kiasikeh yon se pampa nopa política europea nohkia kipiaya miak kualantli waya turcotlakameh. Alamán mihki ipan junio tlen 1853, wan yeka Santa Anna más chikawak pehki kintotoka liberaltlanawatiyanih. Axkanah wahahki kiihtohki onkas

san nopa dictaduratlanawatilli, kinehki ma nochimeh kitokaxtikah Alteza Serenísima.

Nopa dictaduratlanawatilli kipiaya miak kualantli pampa ax onkayaya tomih wan miak tlawikayaya, wan nopa dictador tlanawatihketl kichiwayaya san tlen ya kinekiyaya, yeka kitlaholtihki tlaxtlawalistli. Pero nohkia achi kualli tekitihki dictaduratlanawatilli pampa moihtuohki tlen achtowi Código de Comercio wan tekitl tlen Ministerio tlen Fomento, ni mochihki pampa monekiyaya kinwalikaseh teposmeh tlen ika tekitiseh, onkas tepostlanonotzalli wan amochkalmeh.

Antonio López de Santa Anna sampa motewihki waya norteamericanotlanawatiyanih, pampa axkanah ixwihtoyah ika tlahko mexko tlalli wan sampa kinekiyayah kitlachtekiliseh ne istmo de Tehuantepec, ne Baja California, wan nohkia estados norteños. Tlen yankuik ministro norteamericano, itokah James Gadsden, kimatiyaya nopa altepetl ax kipia tomih, wan moihtuohki axkanah owi kikowas nopa tlalli. Norteamericanotlanawatiyanih kitekiwihkeh se tlamantli tlen axkualli eltoya ipan mapa tlen ika mochihki nopa tlanawatilli tlen Tratado de Guadalupe wan nohkia kiihtohkeh monekiyaya tlalli tlen Mesilla para welis mochiwas teposhtli kampa panos ferrocarril.

Nopa nechikolistlanawatiyanih ax welki kichihki yon se alianza europea para kinpalewis wan ne norteamericanotlanawatiyanih ayohkana ma kitlachtekilikah itlal, motemahmatihki Santa Anna wan kiihtohki ma mononotzakah ipan diciembre tlen 1853. Estados Unidos kitekiwihki nopa amatlanawatilli para tlachtekis meseta tlen Mesilla wan kitzahki tlanawatilli kampa moihtowayaya

motlamokuitlawis frontera para ax onkas tlatewulistli waya masewalmeh. Santa Anna kintekiwihki nopa 10 millones para nohka tlanawatis, pero nohkia patiyó kiski pampa miyakeh ayohkana kitlepanittayayah dictaduratlanawatilli. Ax nesiyaya kenihki moyolchikawas nechikolistli, wan nochimeh ax kitlepanittayayah dictaduratlanawatilli. Sampa pehki tlatewulistli ipan marzo tlen 1854 ika amatekitl tlen Plan de Ayutla, tlen kiyekanayayah Juan Álvarez wan Ignacio Comonfort. Nopa amatekitl ax kitlepanittayaya nechikolistlanawatiyanih, ax kikualittayaya monamakak Mesilla wan kinekiyaya ma motlali se nechikolisconstituyente tlen sampa kiyolchikawaskia nopa república representativa federal.

Ihkatzah kinpalewiyyayah liberaltlamakeh tlen kintotokakeh wan tlen ewayayah ipan Nueva Orleans, ax onkayaya tomih wan yeka rebeldetlakameh san kichihkeh guerra de guerrillas, ika tlaxtlawalistli tlen Mesilla Santa Anna welki kintewiyah, yeka welki tlanawatihki hasta ipan agosto tlen 1855.

LIBERALTLANAWATILLI,
FRANCESATLATEWILISTLI WAN KEMAH
TLATLANKI REPÚBLICA

Ika dictaduratlanawatilli tlen Santa Anna tlawel mokualaniyyayah. Ihkatzah nopa ome partidos kinekiyayah ma onkah progreso, ax weliyyayah mosenkawah. Conservadores kiihtowayayah nopa tekintl welis nochiwas ika se monárquicotlanawatilli wan se sociedad corporativa, tlen

kinyekanas nechikolisiglesia wan nechikolistlatewiyanih. Liberales inihuantih kiihtowayayah monekiyaya motlalis se república representativa, federal wan popular iwikal ken ne norteamericano, yeka monekiyaya tlamis nochi colonialyotl tlahtlamikilistli, tlamis corporaciones wan fueros, wan kinamakaseh nochi tlen kipiaya clero wan nohkia monamakas comuntlalli wan kehnopa Mexko eliskia se altepetl kampa nochimeh kipiaskiah se achi tlalli. Pero liberales ax weliyayah mosenkawah. Moderados kinekiyayah yolik ma mochiwa nopa tekintl para ax onkas kualantli yeka kinekiyayah ma sampa motlali Amatlanawatilli tlen 1824, wan moyankuilis. Puros kinekiyayah ma mochiwa pa nimah ika seyok tlamantli, inihuantih kinekiyayah ma mochiwa se yankuik amatlanawatilli.

Tlatewilistli tlen Ayutla nohka yoltoya pampa kipalewiyayah tepemeh tlen sur wan pampa onkayaya ohtli ipan mar tlen Acapulco, pero tlawel monekiyaya tomih wan yeka ne tlatewihketl Comonfort yahtoya Estados Unidos kitemoto nopa tomih, ax kiasik. Pero kena nohkia kentzih mopalewihki. Ipan 1855 pehki se moderadotlatewilistli ipan Bajío, sampa seyok monarquistatlatewilistli ipan San Luis Potosí tlen kinekiyaya ma tlanawati Agustín de Iturbide ikone ipan se yankuik imperio. Pampa panoyaya nochi yaini san sehko monechikohkeh liberales pursos wan moderados wan mokuepkeh tlen kintotokaktoyah, wan nohkia tlatewiyanih tlen Álvarez, tlen yolik momoyatoyah, nehnemiyayah wan kitotokakeh Santa Anna ipan 17 tlen agosto tlen 1855.

Ipan 16 tlen septiembre liberales itztoyayah ipan altepetl. Ipan 14 tlen octubre se nechikolistli tlen estataltlanawatiyanih

kiihtohki elis tlanawatihketl provisional ne Juan Álvarez, tlen tekutihki waya liberales puros: Melchor Ocampo, Benito Juárez, Ponciano Arriaga wan Guillermo Prieto, tlanawatiyanih tlen onpewayayah. Pa nimah pehki nopa reforma kemah monextihki Juárez Tlanawatilli, ika yani tlamiyaya fuero militar wan fuero eclesiástico, wan kehni nochimeh kipiayah xitlawalistli. Nechikolisiglesia sampa motlalanayaya wan ipan 1840 xiwitl, sampa pehki tlatewiya.

Juan Álvarez ayok kinehki tlanawatis ipan 11 tlen diciembre wan kipatlak ne moderado Comonfort, ya pa nimah kinkalakhki san moderados ma kipalewikah. Kemah Comonfort kiski para kintewis tlatewilistli poblano prorreligión wan fueros, kemah kitlanki kikixtilki nochi tlamantli tlen kipiaya ne obispado tlen Puebla. Wan kikuallalki ome reformistatlanawatilli: Tlanawatilli Lerdo, tlen kinamakayaya nopa fincas rústicas wan urbanas tlen eltoya imako nechikoliscivil wan nechikolisiglesia, wan Tlanawatilli Iglesias, tlen kiihtowayaya iknotlakameh ayohka tlaxtlawaseh tomih. Ne arzobispo tlen Mexko ax kinkualittak nopa tlanawatilmeh, pampa kiihtowayaya ika yaino kiixpanoyaya nechikolisglesia.

Teipah kemah mochihi tlaphepenalistli, Nechikolistli Constituyente mosentilihki ipan 14 tlen febrero tlen 1856. Ihkatzah onkayayah miyakeh moderados, puros kipiayah más kualli isanil, tlawel motewiyayah. Tlamantli tlen ika más motewihkeh elkeh tlamachtlistli wan tlatlepanittalistli tlen cultos. Liberales inihuantih kinekiyayah kiihtoseh kenhkatzah elis tlamachtlistli tlen teipah, pero ax welkeh kichiwah yaino. Kinekiyayah kiihtoseh nohkia ma onkah tlatlepanittalistli tlen tlaneltokilli pero moihlihkeh melawak

onkas tlatewilitli, tlaneltokilli católica tlanki ipan Estado, pero moihtohki “nochimeh weliseh tlaneltokaseh san katlia kinekiseh”. Sekinokeh liberales kinekiyayah kikuisseh anglosajóntlanawatilli, pero miyakeh kiihtohkeh axkanah kualli. Nohkia mononotzkeh tlen reforma agraria, pero ipan amatlanawatilli san mokahki tlanawatilli tlen Ley Lerdo, kampa moihtowayaya nochimeh tlakameh wan siwameh weliseh kipiaseh tlalli.

Nopa tlanawatilli tlen monextihki ipan 5 tlen febrero tlen 1857 ax eliyaya radical, pero yolik kikalaktiyahki “xitlawalistli tlen tlakameh”: tlen tlamachtlistli wan tlen tekitl; xitlawalistli tlen expresión, tlen tlahtlanilistli, tlen nechikolistli, tlen propiedad; nochimeh tlakameh eliseh iwikal wan axkanah mitztzakuaseh eyi tonatih tlan ax onkah kenke. Ipan nopa tlanawatilli moihtuilohtoya nochimeh tlakameh wan siwameh kipiayah se “república representativa, democrática wan federal kampa kalaktoyah estados libres wan inihuantih monawatiyayah”, ika se nechikolistlanawatiyanih tlen kipiayah eyi pamitl, ika se legislativo unicameral tlen tlanawatiyaya. Mokahki kenihkatzah mochiwas tlahpepenalistli tlen tlanawatihketl, eliskia “achtowi indirecta wan axaka kimatis kenihki titlawasanki”, ni kiihtosneki, tekiwameh kitlaliseh ahkia elis yankuik tlanawatihketl.

Onkak tlahpepenalistli wan Comonfort elki tlanawatihketl, pero ax kipiaya tomih yon liberalchikawalistli pampa nochi tlamantli tlen kipiayah eclesiásticos axkanah monamakatoya wan yeka ax kipiaya tomih ne Estado, tlanawatilli Lerdo axkualli mochihki pampa ax kitlalanayaya tlahtlawalistli, nohkia onkayaya descuentos wan kiseliyaya tlahtlawalistli

ika bonos de deuda, tlen ax patiyayah. Nopa tlanawatilli san kipalewiyayah ne arrendatariotlakameh, pero teipah mokahki ininmakoh tlen especuladortlakameh.

Ihkatzah kualli mochihtoya, conservadores wan puros ax kamatiyayah tlanawatilli. Pampa panoyaya ni tlamantli, tlanawatiyanih achi motemahmatiyayah, wan yeka teipah kiski se tlakatl tlen itokah Benito Juárez, ya kualli tlahlamikiyaya wan kinekiyaya ma kitlepanittakah amatlanawatilli. Juárez moskaltihtoya ipan se masewalchinanko tlen sierra oaxaqueña wan momachtihhtoya ipan seminario wan ipan Instituto de Ciencias tlen iestado. Nochi iteki kikualittayayah federalistas radicales wan centralistas. Ipan 1847 elki diputado tlen mexkonechikolistli wan teipah yolik mokalaktiyahki ipan yolistli tlen política nacional, ihkatzah teipah mokupeki iestado pampa elki gobernador ipan 1847 hasta 1851 wan sampa ipan 1856; teipah elki tlanawatihketl tlen Suprema Corte de Justicia ipan nopa xiwitl, yeka monehki mokuepas ipan altepetl ipan 1857 xiwitl.

Nopa papa Pío IX ax kamatiyaya kenihki tlanawatiyaya liberal nechikolistlanawatiyanih wan kiihlihki ne arzobispo Antonio Pelagio de Labastida ma tlatewi, yeka kitotokakeh. Pampa panok nochi yaini liberales moihliyayah monekiyaya se dictaduratlanawatilli liberal tlen ika mopalewiseh. Yeka nopa tlatewihketl Félix Zuloaga ipan diciembre tlen 1857 kiihtohki moneki onkas se yankuik nechikolisconstituyente. Tlanawatihketl Comonfort ax kimatiyaya tlan kualli tlanawatis ika nopa tlanawatilli, yeka kipalewihki wan kitzahki Juárez, pampa ya ax kinekiyaya ma onkah golpe de Estado. Se ome semana teipah Zuloaga ax kitlepanittak ne Comonfort wan kiihtohki ya tlanawatis, yeka ayohkana

tlawatihki wan nohkia kimalakanki don Benito, ihkino sampa ya elki tlanawatihketl. Pampa ome tlanawatiyanih onkayayah kichihki ma onkah civiltlatewilistli.

Altepetl moxexelohki. Nechikolistlanawatiyanih tlen Colima, Guerrero, Guanajuato, Jalisco, Michoacán, Oaxaca, Querétaro, Veracruz wan Zacatecas kiihtohkeh ma onkah constitucionalohtli, pero nechikolistlatewiyanih wan clero kipalewiyayah Zuloaga, pampa eliyaya iaxka altepetl, yeka kitlepanittakeh extranjerotlanawatiyanih. Juárez nel kinekiyaya kikuatlalis nochi tlen axkualli eltoya, wan yeka yahki Guadalajara, pero nepa itztoyah conservadortlanawatiyanih tlen ax kinekiyayah kiittaseh, yeka yahki Veracruz, ni eliyaya liberal, wan nopayo kiasiskia tomih wan tlapalewilistli tlen aduana.

Teipah nopa nechikolistlatewiyanih kipalewihki conservadortlanawatiyanih, liberaltlatewiyanih eliyayah tlakameh tlen walayayah tlen nacionaltlamokuitlawiyanih tlen tlatewihkeh ipan 1846. Pero ni tlamantli axkualli mochihki wan conservadortlatewiyanih tlatlankeh ipan nochi tlatlahko tlen altepetl, teipah tlatewihketl Miguel Miramón kipatlak Zuloaga wan ya elki tlanawatihketl. Miramón chikawak tlatewihki ipan Veracruz, wan kimapachki ipan ome sitios. Ax tlatlanki kemah achtowi tlatewihki wan yeka moihlihki teipah tlatewis ipan tlalli wan nohkia ipan mar, yeka kikohki se tepostli tlen ika tlatewiskia ipan mar, wan ya tlatewiskia ipan puerto. Ihkino Juárez moihlihki kiihlis Estados Unidos ma kipalewi pampa ni altepetl ax kintlepanittayayah conservadortlanawatiyanih pampa ax kinehkeh kinamakiltiseh tlalli, kitlatlanilihki nopa flota americana ma kinketzah nopa embarcación pampa eliyaya

piratería. Ihkatzah nopa comandante ax kipiaya tlanawatilli kena kipalewihki, wan kehnopa axkanah welkeh kintewiyah, teipah ipan se tribunal moihtohki nopa tlamantli ax kualli mochihki.

Tlawel monekiyaya tlapalewilistli tlen puros wan tlen tomichiwanih, inihuantih kinekiyayah kitlamokixtiliseh ne clero, Juárez wan purotlanawatiyanih kiihtohkeh kikualtlaliseh reforma wan ipan 12 tlen julio tlen 1859 pehkeh kinkixtiah Leyes de Reforma: nochi tomih tlen clero elis tlen altepetl, ax sansehko itztoseh iglesia wan Estado, tlamis nochi religiosonechikolistli (cofradías, congregaciones wan hermandades), onkas kampa monamiktiseh, cementerios ayohka eliseh tlen clero wan nochimeh weliseh tlaneltokaseh san katlia kinekiseh.

Nopa ome nechikolistli tlen motewiyayah ax kipiayah tomih wan yeka kitemotinemiyayah ipan sekinokeh altepemeh. Washington kinihlihki liberales kena kinpalewis pero kinekiyaya ma kinamakiltikah tlalli, pero ni axkanah kalahki. Nopa liberales kiwasanihkeh tlanawatilli tlen Tratado McLane-Ocampo kampa kitlanetiyayah ome millones tlen pesos ne Mexko, wan ya kinkawaskia norteamericanotlakameh ma panokah ipan istmo tlen Tehuantepec, axaka kintzakuiliskia wan weliskiah tlanamakaseh wan nohkia kalakiskiah tlatewiyanih tlan monekiskia. Pero norteamericanotlanawatiyanih kiihtohkeh axkanah mochiwas.

Conservadores inihuantih kitlatlanilitoh tlapalewilistli europeoaltepemeh wan waya kaxtiltekameh kiwasanihkeh tlanawatilli Tratado Mon-Almonte, tlen kitlepanittayaya Convención tlen 1853 tlen kiwasanki Santa Anna, kampa moihtowayaya onkah tlawikalistli. Nohkia kitlatlanilitoh

tlapalewilistli suizo tomichihketl Jácker wan kitekiwihkeh nohka británicotomih, nochi yaino ax kikualittakeh extranjeroaltepemeh tlen kinekiyayah ma Mexko moxitlawa nochi tlen tlawikayaya.

Ipan Veracruz axtlen panok wan tlatlanki liberalnechikolistli. Tlatlankeh ipan Silao wan Calpulalpan yan yeka panokeh xitlawak ipan altepetl. Juárez kalahki ipan 11 tlen enero tlen 1861, pero nohka onkayaya miak kualantli. Nopa conservadores nel kualantoyah ya wan pehkeh mononotzah wan monechikowah ipan Europa, wan nohka kinmiktihkeh ne Ocampo, Leandro Valle wan Santos Degollado. Juárez, ika ikuentah, ya kitotokak nopa delegado apostólico, tlen arzobispo, tlen sekinokeh obispos wan ministrotlanawatiyanih tlen altepemeh Kaxtillan, Guatemala wan Ecuador, pampa kinpalewihtoyayah conservadores.

Ipan tlaphepenalistli tlatlanki Juárez, ya pa nimah kikualtlalki administración wan tlamachtlistli, wan kiihtohki onkas sistema métrico decimal. Pero ax kipiaya tomih wan yeka ayohkana welki kintlaxtlawiyah altepemeh, ax weliyaya tlaxtlawa británicotlawikalistli, kaxtiltawikalistli yon francestlawikalistli. Ni tlamantli tlen panoyaya kitekiwihkeh mexkomonarquistas tlen ewayayah ipan Europa para kiihliseh ne emperador tlen Francia, Napoleón III, monekiyaya motlalis se monarquíatlanawatilli ipan Mexko. Nopa emperador francés temikiyaya welis kikualtlalis se imperio “latino” tlen kitekiwiskia para kitzakuilis expansión anglosajona, yeka moihlihki kitekiwis nopa tlamantli tlen panoyaya para welis mokalakia, kinsentilihki wan waya mononotzki Gran Bretaña wan Kaxtillan. Ipan Londres, ipan 31 tlen octubre tlen 1861, nopa eyi altepemeh

kiwasanihkeh se amatl kampa mosenkahkeh kitzakuaseh puertos tlen Mexko ipan Golfo para kehnopa kintlaxtlawilis tlen kintlawikiliah, pero nohkia mosenkahkeh axkanah mokalakiseh waya nechikolistlanawatiyanih.

Flota tlen kaxtiltekameh asiko ipan Veracruz ipan diciembre, wan ipan enero asikoh tlen francesa wan inglesa. Juárez kiselki se amatl wan teipah kititlanki ne ministro Manuel Doblado ma yowi mononotzah waya intervencionistatlatewiyanih. Para kehnopa ax onkas fiebres tropicales, Juárez kiihtohki kena welis temoseh tlatewiyanih pero sampa tlahoskiah tlan axkanah mosenkawaskiah. Doblado kinihlihi kenah moxitlawaseh pero ipan nopa kawitl ax kipiaya tomih, teipah kena. Británicotlakameh wan kaxtiltekameh kiihtohkeh kualtitok, pero francestlakameh kiihtohkeh axkanah, wan kintemowihkeh nochimeh tlatewiyanih, waya inihuantih walayayah sekih mexkomonarquistas, ken ne Juan N. Almonte, ikone Morelos.

Ipan 17 tlen abril francestlakameh pehkeh nehnemih. Tlawel owi eliyaya, yeka Juárez kinmakak se amnistía ne conservadortlanawatiyanih wan tlanawatihki ma mochiwakah guerrillas. Ignacio Zaragoza kikualtlalki nochi para kimanawis Puebla wan tlatewis waya tlatewiyanih tlen más kualli ipan nochi tlaltipaktli. Nopa conde de Lorencez nel moweyimatiyaya wan ax tlakahki tlen kiihlihi Almonte wan ipan 4 wan 5 tlen mayo nopa “gavillas” tlen Zaragoza kitlanihkeh. Napoleón tlawel mosisinihki wan sampa kinnawatihki 30 000 tlatewiyanih waya seyok tlayekanketl.

Se xiwitl teipah, mexkotlatewiyanih mosentilihkeh ipan Puebla, ayohkana itztoya Zaragoza pampa mihki ika tifo.

Wahahki motewiyah, pero tlatlankeh francestlakameh ipan altepetl. Juárez cholohki wan ipan altepetl kalahkeh ipan junio. Francestlakameh kichihkeh se notablenechikolistli wan nopayo kiihtohkeh motlalia imperio ipan 19 tlen junio wan kiihtohkeh kiihliseh ne Maximiliano de Habsburgo ya ma eli weyi tlanawatihketl. Ipan nopa nechikolistli kalaktoyah tlatewiyanih, civiltlakameh wan eclesiásticotlakameh, nohkia arzobispo Labastida, pero inihuantih axkanah tlanawatiyayah, tlen kena eliyaya ne mariscal Achille Bazaine, wan ya kinawatiyaya Napoleón III. Teipah asiskia emperador, francestlatewiyanih ipan miyakeh altepemeh tlatlankeh. Ihkatzah tlawel kualli tlatewiyayah francestlakameh, nohkia nel moweyimatiyayah wan nopa axkualli elki, yeka nopa guerrillas tlen liberaltlatewiyanih nohkia chikawak tlatewiyayah, nopa tlatewilistli tlawel wahahki, axkanah san se tlatlaniyaya, kemantika tlatlaniyayah ipan se chinanko wan kemantika kintlaniyayah, kehnopa elki.

Maximiliano, eliyaya iikni tlen emperador tlen Austria wan monamiktihtoya waya Carlota Amalia, ikone tlen rey tlen Bélgica, kinselihki ipan castillo tlen Miramar mexkomonarquistas. Nopa archiduque kiihtohki kinekiyaya mexkoewanih ma kinonotzakah, kena kehni mochihki pampa mexkomonarquistas kinpehpenkeh miles tlen tlawasantli. Kimakatoh nochi yaino ipan 10 tlen abril tlen 1864, Maximiliano kiselki nopa kuatopilli.

Nopa emperador kinwasanki ome tlanawatilli waya Napoleón III, ya kinekiyaya Mexko ma tlaxtlawa nochi. Francia nohka kinkawaskia 28 000 tlatewiyanih wan kitlanetiskia 175 millones tlen francos, pero kimakaskia

Maximiliano san chikueyi, pampa miak kitlawikiliyaya wan monekiyaya moxitlawas. Ipan nopa tlanawatilli moihkuilohki nopa tlatewiyanih elitih 38 000 wan pewaskia mokuekuetzih chiwas hasta ipan 1865 xiwitl, kehnopa mosenkahkeh.

Teipah kemah kipaxalotoh papa, yankuikheh emperadores yahkeh Veracruz wan asitoh itlamiya mayo tlen 1864. Ipan liberal puerto kinselihkeh ika sesequistli, axkanah iwikal kinselihkeh “tlen nel kualli tlakameh wan siwameh” tlen Orizaba, Puebla wan Mexko altepetl, nochimeh inihuantih tlawel kualli kinselihkeh wan miak tlamantli kinmakakeh.

Miyakeh liberales moderados tekitihkeh waya imperialnechikolistli pampa moihliyah kikualtlalis nochi kualantli tlen onkayayah desde ipan 1821. Maximiliano kineltokayaya liberaltekitl, kiihtohki onkas patronato real, onkas tlatlepanittalistli tlen tlaneltokilli wan mochiwas nacionalización nochi tlen kipiaya clero, nochi yani ax kikualittak nuncio papal. Pampa kichihki yani sekih conservadores ayohkana kipalewihkeh wan sekih liberales san kipaktihkeh. Nesiyaya Mexko sampa motlalanayaya pampa nopayo mosewiyaya corte imperial. Nopa capital moyehyektzih chihki, kikualtlalkeh ohtli, kintohkeh fresnos wan onkak tlawilli tlen gas. Neski weyi ohtli tlen imperio, tlen teipah liberales kitokaxtihkeh de la Reforma, wan moyankuilihki castillo de Chapultepec. Emperador kualli tlanawatiyaya. Pehki kiihkuilowa tlanawatilli Estatuto del Imperio, tlen monextihki ipan 10 tlen abril tlen 1865, teipah kiski tlanawatilli código civil wan tlanawatilli ley agraria wan tlanawatilli tlen tekitl, ika nopa tlanawatilli sampa kinkuapiliyah inintlal masewalchinankomeh wan kinmakayayah tlen ax kipiayah. Ipan tlanawatilli

moihkuilohtoya ipan se tonatih san matlaktli kawitl welis titekitis, tlamis tlawikalistli tlen más tlen 10 pesos, ax welis timakilis akahya wan ax miyakeh tiendas de raya ma onkah. Tlamachtlisti wan tlatemolistli nohkia moyolchikahkeh, wan emperatriz kimoyawayaya siwatlamachtlistli. Maximiliano kixexelohki mexkohlalli ipan 50 departamentos wan kinekiyaya ma onkah tomih, yeka kiwasanki se amatekitl para welis mochiwas ferrocarril tlen Mexko hasta Veracruz wan tlanawatihki ma tekitikah nopa Banco de Londres, Mexko wan Sudamérica, kehnopa kualli mochiwaskia tlanamakalistli waya sekinokeh altepemeh.

Francestlatewiyanih kichihkeh ma Juárez yowi ipan norte. Nopa tlanawatihketl monehki tlatewis waya francestlakameh wan nohkia waya tlen kikakayahkeh. Ipan 1864 nopa republicanos tlatlantoyah ipan miyakeh estados tlen norte, Colima, Guerrero, Tabasco wan Chiapas, pero ipan 1865 san kipiayah kuekuetzitzih tlalli. Miak kualantli onkayaya, wan yeka nopa tlatewihketl Jesús González Ortega, ministro tlen Suprema Corte de Justicia, tlen itztoya Estados Unidos kiihlihki Juárez ma kimaka kuatopilli pampa ayohkana eliyaya tlayekanketl. Don Benito, kiihtohki axkanah kimakas pampa ipan altepetl onkayaya tlatewilistli, ihkino ya tlanawatiskia hasta ma tlami, pampa kichihki yaino sekih puros ayohkana kipalewihkeh.

Kemah tlamiyaya 1865, nochi mopatlatiyahki. Tlantiyowiyaya civiltlatewilistli ipan Estados Unidos wan yeka liberales kitlatlanilihkeh nopa altepetl ma kintlaneti eyi millones tlen pesos wan nohkia kichihkeh ma ayohkana mokalaki ipan Mexko. Nopa republicanatlatewiyanih pehkeh tlatewiyah wan tlatlaniyayah san kampa weli.

Ayohkana onkayaya tomih tlen kitlanetihtoyah francestlakameh, nopa imperio axkemah kipiaya tomih wan nohkia kihakki Napoleón III kinwikas itlatlewiyanih pampa nopa Confederación Alemana nohkia moyolchikawayaya. Axkanah welki tlatlanki ipan altepetl pampa tlawel weyi eliyaya. Maximiliano kinehki kisentilis se nacional nechikolistlatewiyanih wan kinnotzkih conservadortlamokuitlawiyanih tlen kintitlantoyah Europa para ma mononotzakah. Iikni Francisco José kiihlihki kena kintitlanilis 4 000 austriacotlatewiyanih, pero Estados Unidos ax kikualittak nopa tlamantli. Nopa emperatriz kiitohki yas Europa para ma kitlepanittakah nopa amatlanawatilli, pero yon Napoleón III yon papa axkanah kikakihkeh, ya teipah tlapolki. Kemah kimatki nochi yaino Maximiliano moihlihki ayohkana tlanawatis pampa onkayaya miak kualantli, pero nopa ministros kiihlihkeh ma ax kichiwah yaino, ihkatzah teipah iselti mokahki.

Kemah pewayaya 1867, republicanotlatewiyanih chikawak kitewiyaya imperio wan itztoya san ipan Puebla wan Veracruz. Nopa emperador momanawito ipan Querétaro, kampa kipalewihkeh Miguel Miramón wan Tomás Mejía. Ipan 2 tlen abril Porfirio Díaz tlatlanki ipan Puebla, yeka Miramón kiihtohki ma cholokah tlen Querétaro, pero Maximiliano ax kinehki wan tlatewihki. Teipah kiitzkihkeh. Juárez wan Lerdo kinekiyayah ma kitlalwilika tlanawatilli tlen 1862, yeka kitlahihlihkeh ipan se consejo tlen guerra. Ome tlen kualli abogados kinekiyayah kipalewihkeh, pero axtlen welkeh kichiwah pampa kimiktiskia. Miyakeh altepemeh kititlankeh amameh para ma ax kimiktikah Habsburgo, Juárez ax kinkahki. Nopa emperador axkanah kimawiliyaya mikistli.

Teipah kemah kintlahkuilwilihki inana wan isiwa yahki para ma kimiktikah waya Miramón wan Mejía ipan tepetl de las Campanas, ipan 19 tlen junio tlen 1867. Achtowi kemah kimiktiskiah, Maximiliano kiihtohki ika ieso “moxitlawas nochi kualantli tlen onkayaya ipan yankuik patria”.

Kemah welonki imperio, ipan 16 tlen julio tlen 1867 Juárez mokuepki ipan Mexko altepetl, wan namah nochimeh tlakameh tlawel kitlepanittayayah pampa tlawel kualli tlatewihtoya. Pampa tlatlanki república ayohkana onkaskia monarquista, pero nohka onkayaya miak kualantli wan namah tlatewiyayah nohkia liberales pampa inihuantih kinekiyayah tlanawatiseh. Juárez kiihtohki pa nimah ma mochiwa tlaphepenalistli ipan agosto. Nopa partido conservador nel polihki wan yeka eyi liberaltlakameh motewihkeh: Juárez, Sebastián Lerdo de Tejada wan Porfirio Díaz, tlen kualli tlatewihketl. Ihkatzah Juárez tlatlanki, miyakeh kiskeh tlen ax kikualittayayah, pampa ya sampa tlanawatiskia wan kinekiyaya ma mokualtlali nopa amatlanawatilli, yaino ax kikualittayayah. Pero nopa Juárez nel kualli tlanawatihtoya, tlawel kualli tekitihki kema onkak tlatewilistli ipan matlaktli xiwitl, ihkatzah axkanah onkayaya nechikolistlanawatiyanih. Ika iteki kichikawaltihki ejecutivo, pero namah eliyaya seyok tlamantli, pampa ipan Amatlanawatilli tlen 1857 moihtulohtoya nopa legislativo más ipatih, pampa eliyaya unicameral, yeka kimawiliyaya. Yeka Juárez kinekiyaya kikualtlalis Senado para kualli tekitis. Juárez ya kinpehenki se nechikolistli tlen civiles constitucionalistas, wan yeka kulankeh tlatewiyanih pampa inihuantih kiihtowayayah miak tlatewihkeh wan yeka tlatlankeh, wan nohka kipalewiyayah ne Porfirio Díaz.

Onkayayah miyakeh tlakameh tlen ax kikualittayayah don Benito wan nochimeh tlen waya tekitiyayah, yeka tlawel ika sátiyas wan caricaturas políticas, ihkatzah yaino panoyaya, onkayaya xitlawalistli para mochiwas wan nochimeh monekiyaya kitlepanittaseh.

Ihkatzah tlatlankeh nohka onkayaya miak kualantli, wan sampa pehkeh motewiyah religiones wan centro, pampa ya kinpalewihtoyayah militartlanawatiyanih para axkanah tlawelawaseh wan kipiaseh tomih. Monekiyaya tlamis nopa tlanawatilli wan sampa mokualtlalis nochi, yeka nopa nechikolistlanawatiyanih kipalewihki Juárez wan mochihi se tlanawatilli para tlamis. Sekih conservadortlanawatiyanih mosisinihkeh pampa ax kikualittakeh kinmakilki. Juárez kinekiyaya ma tlami nochi kualantli yeka ipan 1870 kikualtlalki se tlanawatilli para welis mokuepas arzobispo Labastida, wan kitlepanittaseh.

República tlawel mokokowayaya pampa wahahki tlawewilistli wan monekiyaya onkas tomih. Tlanamakalistli axkualli eltoyah, ihkatzah ipan frontera norte onkayaya se tlalli kampa miak tlamantli monamakayaya wan onkayaya tomih. Kemah elki tlawewilistli tlen secesión tlen Estados Unidos, ichkatl tlen nopa altepetl panoyaya ipan Matamoros wan nohka monamakak harinas, tlakualistli wan miak tlamantli tlen mochichwayayah ipan Mexko. Nochi yani kinchikawaltihki Monterrey, Piedras Negras, Laredo wan Matamoros.

Ipan república ax onkayaya tomih wan tlaihyowiyaya. Ihkatzah monamakak nochi tlamantli tlen clero ax kaxiliyaya, san se kentzih mopalewihki ika nopa tlapalewilistli para moxitlawas nochi tlen tlawikayaya. Juárez kinekiyaya

kikualtlalis nochi, kikualtlalis hacienda pública, yani tlawel monekiyaya para welis momoyawas wan moskaltis. Nopa iministros José María Iglesias wan Matías Romero pehkeh momachtayah tlen hacienda wan tlen tlawikayaya. Kiittakeh tlawika 450 millones wan kitemowihkeh wan mokahki san 84, teipah kikualtlalihkeh se yankuik ipowaltonatih kampa kitlahkeh ipan katlia tonatih tlaxtlatiyas nochi tlen tlawika. Nohkia pehkeh kiahokuiyah tomih, kikuekuetzih chihkeh nechikolistlatewiyanih wan mokahkeh san 20 000 tlakameh. Ipan 1870 nopa Romero kiihkuilohki nochi tlamantli tlen hacienda pública desde kemah onkak independencia, ya kimatiyaya keske tomih kalakiyaya wan kisayaya, ika yaino kikualtlalki se presupuesto gubernamental. Juárez eliyaya se kualli liberal, kinekiyaya ma onkah tomih wan tlakameh ma kualli itztokah, yeka kinekiyaya kikualtlalis miak tlamantli: tlen tomih, tlen tlanonotzalistli (tlen más teposanilli, ohtli wan ferrocarriles) wan ma mochiwa colonización. Kiihtoiki moneki mochiwas miak tekintl, kalakis tomih tlen norteamericana, wan kitlepanittak amatekitl tlen kiwasanki imperio kampa moihkuilohtoya mochiwas nopa ferrocarril tlen yaskia tlen Veracruz hasta Mexko. Iministro Romero nohkia tlawel kinekiyaya kichiwas se banco nacional wan ihkino onkaskia san se moneda tlen motlaloskia, ax welki mochihki pampa ax onkayaya tomih, kentzih mokuesohki, pero nohkia pehkeh tekutih Banco de Londres, Mexko wan Sudamérica.

Juárez moihliki tlawel monekiyaya moyolchikawas tlamachtlistli. Ika nopa tlamachtlistli moyolchikawaskiah wan motlalanaskiah, nohkia ika kinsehotiliskiah nochimeh masewalmeh para kualli itztoseh ipan altepetl. Kehni,

ipan 1867 kikixtihki se tlanawatilli kampa moihkuilohtoya axkanah onkas tlaxtlawalistli ipan tlamachtlistli elemental, wan kikualtlalki Escuela Nacional Preparatoria.

Seyok tlamantli tlen kinekiyaya kikualtlalis eli Mexko ma sampa kualli mowika waya sekinokeh altepeme, pampa kemah onkak tlatewilistli ayohkana mononotzayaya waya Gran Bretaña, Francia wan Kaxtillan, pero nohkia onkayaya kualantli. Ax weliyaya mononotza waya iberoamericanoaltepeme pampa wahka itztoyah wan ax onkayaya teposanilli, nohkia onkayaya kualantli waya Guatemala; ika yaino, Juárez ax kinekiyaya mokualanis waya Estados Unidos. Ihkatzah nopa altepetl ax kipalewihki kemah mochihi intervención, nopa ome altepeme kualli mowikayayah. Teipah kemah tlanki tlatewilistli, nopa altepetl kichihki miak tekittlen industrialización, wan namah miak tomih onkayaya. Pero onkayayah ome kualantli ipan nopa altepeme: tlen ma panokah nómadatlakameh wan tlachtekinih ipan frontera wan nohkia nopa reclamaciones. Tlen achtowi kualantli kehnopa mokahki, pampa Juárez wan Lerdo kiihtohkeh axkanah panoseh norteamericanotlakameh ipan frontera kintotokatinemiyaseh “culpabletlakameh”. Juárez kinehki kikualtlalis nopa kualantli tlen reclamaciones wan kiihtohki ma mochiwa se nechikolistli binacional wan mosenkawaseh. Ni nechikolistli kikualtlalki reclamaciones norteamericanas, pero poliwitoh tlen Mexko. Ipan 1869 Mexko pehki waya mononotzah wan waya mowikah ika ome yankuik altepeme tlen eliyayah: nopa Reino de Italia wan nopa Confederación Alemana del Norte.

Kemah mochihi tlapehpenalistli tlen 1871, Juárez ayohkana miyakeh kitlepanittayayah, pero sampa ya

elki tlanawatihketl. Díaz axkanah kikualittak yaino wan kichihki amatekitl Plan de la Noria ipan 8 tlen noviembre, kampa moihkuilohtoya “axkanah san setzih tlanawatiyas nochipaya”. Tlatewilistli yahki san tlamantzih ihkatzah miyakeh kinixmatiyayah wan juaristatlatewiyanih teipah kiketzkah. Juárez kitekiwihki nochi yaino wan nohka pampa liberaltlakameh motewiyayah welki nohka tlanawatis, ya miak kualantli kipiayah wan mokokowayaya. Juárez mihki kemah nohka mosewihtoya ipan 18 tlen julio tlen 1872.

Ika amatlanawatilli, Lerdo, tlen eliyaya tlanawatihketl tlen Suprema Corte, ya kitlalanki kuatopilli tlen ejecutivo wan kichihki se amnistía para nochimeh tlen ika tlanki tlanawatilli tlen La Noria. Pa nimah kiihtohki ma mochiwa tlapehpenalistli, wan ya tlatlanki. Don Sebastián nohka tlahlamikiyaya ken Juárez wan sampa welki kitlalia Senadonechikolistli wan kipatlak tlanawatilli tlen Reforma para ma elikah constitucionaltlanawatilli. Tlamantli tlen religiosos ax kintlepanittayayah wan kintotokak nopa Hermanas de la Caridad, ihkatzah kintlamokuitlawiyayah tlen mokokowayayah. Kineltokayaya “anticlericalismo” wan yeka miyakeh mosisinihkeh wan kinekiyayah kitewiseh, nohka onkayaya tlatewilistli kampa yaquis de Cajeme wan tlen Manuel Lozada ipan Tepic, tlen kimiktihkeh kema tlamia 1873. Lerdo nohka moixnamihki waya Gran Círculo de Obreros tlen Mexko, pampa onkayayah huelgas textiles wan mineras, wan ika tlen kitemoyayah tlanamakalistli, pampa ax kinehki temakas se tlanawatilli para ma mochiwa se ferrocarril tlen kinsehotiltoskia Mexko waya Estados Unidos, ihkatzah kenah mochihki ferrocarril tlen Veracruz hasta Mexko ipan 1873.

Sampa onkak kualantli pampa ax momatiyaya ahkia tlanawatis. Lerdo sampa kinekiyaya elis ya, pero Díaz ax mochixki ma onkah tlapehpenalistli wan pa nimah moketzki ika amatekitl Plan de Tuxtepec, kampa moihtowayaya nopa Lerdo “ax kitlepanitta wan kiixpano amatlanawatilli”. Díaz kimatoyaya kenihkatzah kichiwas nopa tlamantli pampa panok tlatewilistli tlen La Noria, ika tlamantzih kichihki. Lerdo mokalakhki ipan tlapehpenalistli tlen Oaxaca, wan yaino kitekiwihki para kinihlis sekinokeh ma sansehko kitewikah. Ipan iestado miyakeh kipalewiyayah, Díaz yahki Brownsville kemah tlamia 1875, desde nepa kinihlihki gobernadortlanawatiyanih wan militartlanawatiyanih ma mopalewikah. Pero nopa tlatewilistli mochiwayaya san ipan noreste wan ipan Oaxaca, yeka sampa kikualtlalki iamateki wan kiihtohki kinmakas amameh militartlatewiyanih tlen kipalewiskiah, ika yaino san kampa weli welki tlatewiya.

Nopa general Mariano Escobedo tlawel kintewiyayah rebeldetlakameh, wan kemah onkak tlapehpenalistli ipan septiembre tlen 1876, Lerdo elki tlanawatihketl. Ipan nopa kawitl, eltoya tuxtepecanotlatewilistli wan kisato seyok kualantli pampa nopa tlanawatihketl tlen Suprema Corte de Justicia, José María Iglesias, ax kikualittayaya kenihki mochihki tlapehpenalistli “pampa onkak tlakahkayawalistli” wan pehki se tlatewilistli ipan Salamanca. Iglesias kiselki kentzih tlapalewilistli, pero kipalewihki Díaz, ya kinyekanayayah nechikolistlatewiyanih, ipan 11 tlen noviembre kintlanki federaltlatewiyanih ipan chinanko tlen Tecuac. Lerdo choltehki wan miyakeh mokuapolohkeh, sekiah tlatewiyanih kitlepanittayayah

Iglesias, yeka monehki monotzaseh nopa ome. Díaz kiihlihki Iglesias kena kitlepanittas ken tlanawatihketl provisional tlan kitlapanas iwikal nopa gabinete wan ya kiyekanaskia nopa Secretaría de Guerra. Iglesias kiihtohki axkanah, Díaz mosisinihki wan ipan 23 tlen noviembre kalahki ipan Mexko altepetl waya se nechikolistlatewiyanih. Se semano teipah ya elito tlanawatihketl.

TLLEN KENIHKATZAH MOPATLATIYAHKI NACIONAL YOLISTLI WAN MOCHIHKI REPUBLICANA

Ipan novohispano tlalli itztoyah chikuase wan tlahko millones tlen tlakameh yeka mochihki se Estado independiente ipan 1821, nochimeh axkanah iwikal eliyayah san pampa nopayo ewayayah wan sehka tlaneltokayayah, wan san se ome tlahtowayah kaxtilantlahtolli. Nochimeh kiittakeh kenihkatzah mopatlak nochi iyolistli pampa nopa tlatewilstli wahahki matlaktli wan se xiwitl wan nohkia kiittakeh kenihkatzah mopatlak nochi tlen mochihtoya ipan 300 años wan onpewayaya se yankuik kawitl. Kaxtillan liberalismo kikalaktoya yankuik tlahtolmeh, tlen monechkawiyayah tlen tradicionales. Onkayaya kuesolli ika independencia tlen Kaxtillan, yeka elitetlakameh wan sekinokeh nechikolistli axkanah más tlaneltokayayah ipan yankuik kawitl, pampa nel mokuesowayah ika nochi tlen panok.

Ax onkayayah miyakeh tlakameh, itztoyah san ipan centro wan ipan sur, ewayayah ipan se nel weyi tlalli tlen kemah tlanawatihki Iturbide nel moweyi chihki, eliyaya nawi millones wan tlahko tlen kilómetros cuadrados; ax

weltoya más moweyi chiwa pampa ahachika onkayaya kokolistli wan tlatewilistli, ihkino ipan tlahko xiwilpilli eliyayah san chikomeh millones tlen tlakameh wan ipan 1870 xiwitl eliyayah chiknawi millones. Ipan altepetl capital ya onkayayah se cuarto tlen millones tlen tlakameh, wahka itepotzko yowiyaya Puebla, Guanajuato, Querétaro, Zacatecas wan Guadalajara. Ax onkayayah tlakameh ipan septentrionales tlalli, nohkia tlawel mopatlayaya tlamantli tlen políticos wan temahmatilli tlen sekinokeh altepemeh, yeka mokuquetzih chihki: Guatemala moxitonki ipan 1823; Texas nohkia moxitonki ipan 1836; Estados Unidos tlatlanki Nuevo México wan Alta California ipan 1846 wan 1847 xiwitl, wan ipan 1853 monamakak Mesilla, kehnopa kemah tlanki nopa kawitl república mokahki san 1 972 546 km². Nopa 19 estados, nawi tlalli wan se distrito federal mopatlakeh, ipan 1869, wan elkeh 28 estados wan san se tlalli.

Pampa motlalki independencia wan república ax kikualchihki korporativanechikolistli. Tlatewilistli kinpalewihki criollotlakameh wan mestizotlakameh pampa inihuantih kena weliyayah yowi kampa kinekiyayah. Pero iwikalistli ax welki mochiwa pampa miyakeh tlakameh apismikiyayah, wan nochi tomih eltoya ininmakoh tlen san se ome tlakameh. Pampa mopatlak tlamantli tlen político nohkia ax kinkualchihki nochimeh. Onkayaya miak kualantli wan axaka tlatlepanittayayah yeka tlanamakanih miak tomih kipolkeh wan haciendas ax weliyayah tekitih kualli. Ipan miak minas kalahki atl pampa axaka tlamokuitlawiyaya wan pampa ax onkayaya tomih teipah kinnamakiltihkeh sekinokeh altepemeh. Tlen burocratatlakameh nohkia

kipolkeh inintekih pampa onkak independencia, moihliyyah kena kintlaxtlawiliseh tlen kintlawikiliyyah wan sampa kinmakaseh tekintl, yeka kikualittayayah nochi tlamantli tlen kinekiyyah kichiwaseh tlanawatiyanih. Nochimeh tlen momachtihtoyah, san sekih tepahtianih wan abogadotekitinih, teipah tekitiyyah ipan burocraciatekitl. Ihkatzah yaino, pampa yahkeh peninsulares ricotlakameh wan pampa onkayayah tlanawatilli para kintotokaseh, nopa criollotlakameh tlahohkeh. Tlen minerotekitinih ayohkana kualli tekutihkeh wan kitlanihkeh tomih wan europeotlakameh kinkixtilihkeh inintekih; wan nohkia kalakiyyah miak burdoyoyomitl tlen ax kinkualchihki tekitinih tlen tekitiyyah ipan sosoltik fábricas kampa kichichwayayah yoyomitl. Tlen sekinokeh tlakameh ax kenihkatzah moihlihkeh pampa owi tlaeltoya ipan nopa kawitl, léperotlakameh wan peladotlakameh inihuntih tlachtekiyyah.

Pampa nohkia mokalakhiki ipan tlatewilistli tlen independencia nopa clero kinpolki miak tlakameh, wan pampa yolik mochiwayaya nopa secularización sekih ayok kinehkeh kalakiseh. Nochimeh tlen tlanawatiyanih moihliyyah nopayo onkah tomih wan kikixtiliyyah, iglesia kiittak kenihkatzah yolik temotiyahki ininrentas wan itomih ipan nawi décadas, kipiayah tomih san 10 obispotlakameh wan 177 canónigotlakameh, tlen nopa clero regular wan secular, san eliyayah 3 500 clérigotlakameh ipan 1825, nochimeh apismikiyyah, wan feligrestlakameh monekiyaya tlaxtlawaseh.

Onkak yankuik ritos wan cívicoilhwitl, tlen mochiwayayah para nesis onkah se yankuik nechikolistlanawatiyanih

wan nohkia para kintlaniseh religiosoilhwitl, yolik motlaltiyahkeh. Kampa miak mopatlak elki ipan puertos wan ipan altepetl pampa asiyayah extranjerotlakameh. Asiyayah nohkia paquebotes tlen kiwalikayayah miak tlamantli, tlen yankuik tlamantli, tlen yankuik yoyomitl wan tlen yankuik teposmeh, wan tlakameh namah weliyayah yowih Estados Unidos wan Europa. Nopa yankuik diligencianechikolistli kichihki ax wahawaseh tlakameh yaseh kampa kinekiseh: yaseh tlen Mexko hasta Veracruz ipan chikome tonatih, yaseh Guadalajara ipan 13 wan yaseh Santa Fe ipan se metztli.

Tlaneltokilli tlen iluminismo nohka eltoya, ya kiihtowayaya ika tlamachtlistli nochi mokualtlalis. Nopa Compañía Lancasteriana ya kinnextiliskiah nochimeh ma welikah tlapowakah, tlen kikuallaltoyah notabletlakameh ipan 1822. Asikoh nohkia extranjerotlamachtianih tlen kinekiyayah tlapalewiseh wan kitlalkeh particularkaltlamachtilyan. Wan nopa weyi kaltlamachtilyan ayohkana kintlepanittayayah wan kinpatlakeh ika academiattlamachtilyan kampa onkayayah científicotlamachtlistli wan ika yankuik institutotlamachtilyan tlen ciencias wan tlayekchiwalistli tlen kintlalanayayah republicanotlakameh, ipan nochi ni yankuik kaltlamachtilyan momachtiskiah tlakameh wan siwameh tlen kalakiskiah ipan política ipan tlahko xiwilpilli.

Ipan itonalpowalli wan almanaques moihkuilowayaya tlen yankuik tlamantli wan científicotlamachtlistli. Nopa politización tlen pehtoya ipan 1808 waya amatlanawatilli tlen yankuik Estado kichihkeh ma onkah amaperiódicos, amafolletos wan políticoamameh, tlen miyakeh kinpowayayah wan kinamatiyayah, motlanetiyayah noso kinkakiyayah

kemah akahya chikawak kinpowayayah ipan pulqueriakalmeh, cafékalmeh wan kampa nochimeh mosentiliyayah. Wan miyakeh nohkia kinekiyayah kipowaseh tlen nemilistli, tlen yani tlahkuilohkeh Servando Teresa de Mier, Carlos María de Bustamante, Lorenzo de Zavala, José María Luis Mora wan Lucas Alamán. Ipan amochmeh moihtkuilohki kenihkatzah mopatlak nochi, tlen yani tlahkuilohkeh José Joaquín Fernández de Lizardi, Manuel Eduardo de Gorostiza wan Fernando Calderón. Tlayekchiwalistli ya ika yolik pepetlakak, ihkatzah nechikolistlanawatiyanih temakakeh sekiah tlapalewilistli para yaseh momachtitih Italia noso Alemania.

Wahahki tlahko xiwilpilli para welki mochiwas secularización tlen nochimeh tlakameh wan siwameh, ihkino kena miak mopatlak. Ika independencia iglesia kipolki nochi tlen kipiaya kemah onkayaya virreinatotlanawatilli, kipolki tlen kemah tlakatiyayah, monamiktiyayah wan mikiyayah wan nochi tlen kipiaya ika Reforma. Nochi yaino kitzakuiki wan ayohkana welki kichiwa iteki ipan kalmeh kampa tepahtiyah, ipan kaltlamachtilyan wan kampa kintlamokuitlawiyah tetatzitzi. Pampa monamakak nochi tlen kipiayah, miyakeh conventos kinmahahkeh noso kintekiwihkeh tlen seyok tlamantli. Wan sekiah iglesias kinmakakeh protestantetlakameh, wan nohka onkayaya miak tlatewilistli. Axkanah kintzahkeh confesionaltlamachtilyan privadas, pero nopa públicatlamachtilistli nelia mopatlak wan moxitonki.

Nohka onkayaya miyak políticotlatewilistli yeka tlahlamikinih, tlen tekitiyayah ipan periodismotekitl, pehkeh tlahkuilowah tlen miak tlamantli ihkatzah ax

kinkualittayayah. Ika periodismotekitl welki momati kenke onkayayah nacionalkualantli, yeka weyi liberaltlahlamikinih kiihkuilohkeh amochmeh tlen ni tlamantli. Kehni, Manuel Payno, tlen kiixmatiyayah pampa kiihkuilowayayah costumbristaamochmeh, kichihki tlatemolistekitl tlen pública tlawikalistli, tlen desamortización wan tlen Reforma; Miguel Lerdo de Tejada kichihki tlen tlanamakalistli wan tlen tomih, wan Melchor Ocampo tlen iglesiakualantli wan tlen Estadokualantli. Yeka ipan 1860 wan 1870 xiwitl nopa prensa moyolchikahtoya wan liberal nechikolistlanawatiyanih kitlepanittayayah ihkatzah kemantika ax kichiwayayah yaino, yeka teipah mokuepki “tlen nawi poder”.

Nel miak kualantli onkayayah pampa onkak tlatewilistli, yeka restauradortlakameh tlen república kinekiyayah kikualtlaliseh nochi tlen axkualli eltoya ika tlamachtlistli wan nemilistli, ayohkana kinekiyayah ma moxexelokah mexkoewanih. Ihkino, kemah apenas sampa asiyyah tlakameh ipan Mexko altepetl, nopa ministro de Justicia pa nimah kinextihki se amatekitl tlen públicatlamachtlistli, tlen mokahki ipan tlanawatilli tlen 1867 wan 1869, ika yaino mochikawaltihki elementatlamachtlistli wan welki moketza se kualli kaltlamachtilyan tlen mediotlamachtlistli: nopa Escuela Nacional Preparatoria. Ipan nopa kaltlamachtilyan kikalakihkeh positivistatlamachtlistli tlen Augusto Comte para kitewis tradicionatlamachtlistli, mopatlak nochi religiosotlamachtlistli wan metafísicatlamachtlistli ika lógicatlamachtlistli wan científicotlamachtlistli. Ika yaini kualli momachtiskiah telpokameh. Juárez wan Lerdo kichihkeh legislativotekitl wan kinketzkeh miak elementalkaltlamachtilyan. Juaristatlakameh

kinekiyayah nohkia nochimeh masewalmeh ma tlahtokah kaxtilantlahtolli para kinsehotiliseh ipan nacional yolistli, pero sekih ax kikualittakeh, miyakeh kikualittayayah positivimostlamachtlistli wan miyakeh axkanah, yeka onkak kualantli kemah mochiwayaya restauración wan porfiriato, miyakeh liberaltlakameh ax kikualittayayah nochi yaino.

Pampa onkak francestlatewilistli isak nopa nacionalismo tlen teipah kalakiskia ipan nochi tlamantli, ipan tlayekchiwalistli, ipan tlahkuilolistli wan ipan tlatzotzontli. Ignacio Manuel Altamirano elki tlen más tekitl kichihki ika itertulias tlen tlahkuilolistli wan irevista Renacimiento, kampa ipan tlahkuilowayayah liberaltlakameh wan conservadortlakameh, ken Manuel Payno, Ignacio Ramírez, Guillermo Prieto, José Tomás de Cuéllar, Vicente Riva Palacio, Francisco Pimentel, José María Roa Bárcena wan Anselmo de la Portilla. Ipan nopa kawitl nohkia mochihkeh académicanechikolistli, ken Sociedad Mexicana de Geografía y Estadística, ne Liceo Mexicano wan Academia Mexicana de la Lengua.

Nopa nacionalismo kixochitihki costumbristatlahkuilolistli wan nemilistlahkuilolistli, pehki pankisah amochmeh. Nopa nemilistlamachtlistli tlawel ipatiyaya wan monekiyaya momoyawas nohkia nopa nacionalnechikolistli yeka pankiskeh tlen achtowi escolaramochmeh tlen nemilistli “patria”. Conservadortlakameh ken Francisco de Arrangoiz, Manuel Orozco y Berra wan Joaquín García Icazbalceta, wan nohkia liberaltlakameh Guillermo Prieto wan Vicente Riva Palacio, pehkeh tlahkuilowah tlen “nacionalnemilistli”. Sekinokeh tlatemohkeh wan tlahkuilohkeh tlen yankuik tlamantli wan

sekinokeh tlen wahahkia panok, nochi tlen colonialyotl wan nohkia tlen prehispaniconemilistli.

Onkak se lotería, wan ika yaino nopa Academia de San Carlos moyankuichihki kemah onkayaya tlatewilistli waya Estados Unidos wan plásticastlayekchiwalistli sampa motlalankeh. Juárez kiyankuiktokaxtihki nopa Academia ken Escuela Nacional de Bellas Artes wan nopayo nopa escultor Manuel Vilar wan tlapalkemeh Pelegrín Clavé wan Eugenio Landesio kimoyawayaya europeotlamachtilistli. Teipah nohkia kiitzkihkeh nacionaltlamachtilistli. Ihkino, nochi tlen ixnesiyaya wan nemilistlamachtilistli kipatlakeh tlen religiosotlamachtilistli, wan nopa litografiatekitl wan caricaturatekitl motekiwiyayah para kintewiseh tlanawatiyanih. Nopa tlapalketl José María Velasco tlawel kualli tekitiyaya wan kichiwayaya miak mexkotlapalmeh, elki tlen más ipatih. Miyakeh tlapalkemeh tlen itztoyah ipan altepetl kikuiyayah tlen yankuik tlamachtilistli, pero ipan provinciachinankomeh tlapalkemeh kichiwayayah seyok tekittl ika bodegóntlapalmeh wan ixkopinkayotlapalmeh ken nopa costumbristatlapalkemeh José María Estrada wan Hermenegildo Bustos. Esculturatekitl nohkia mochikawaltihki pampa mochihkeh estatuas tlen weyi tlanawayatiyanih tlen kintlaliskiah ipan ohtli tlen Reforma. Wan nopa arquitecturatekitl nohkia mochikawaltihki pampa ax weltoya momoyawa, san mochihtoya nopa Teatro Nacional, sekih kalmeh kampa tlanamakayayah wan kalmeh kampa tlatzakuayayah, ni tekittl mochikawaltihki pampa nopa arquitectotekitihketl Javier Cavallari kiwalikak tepostlamachtilistli.

Tlatzotzontli nohkia pehki patlani. Nopa Sociedad Filarmónica, tlen pankiski ipan 1866, kemah tlatlanki

república kimakakeh nopa weyi kalli kampa eltoyah weyi kaltlamachtilyan, nopayo temachtiyayah, tlatzotzonayayah wan mosanilwiyayah. Tlatzotzontli tlen popular tlatzotzonketl Aniceto Ortega miyakeh kiamatiyayah.

Nopa nacionalismo miak tlamantli kichikawaltihki pampa sekih kinekiyayah kiihkuiloseh wan kinextiseh nochi tlamantli tlen altepetl, yeka onkak tlaltlamachtilistli wan tlen seyok. Teipah kalahki cienciatlamachtilistli wan positivisмотlamachtilistli, tlen ika pankiskeh miyakeh especializadas academiakaltlamachtilyan wan miyakeh welkeh kiselihkeh profesionaltlamachtilistli pampa nel mokaltzahki nopa weyi kaltlamachtilyan tlen wahahkia ipan 1865.

Científicotlamachtilistli kipalewihkeh tepahtianih, naturalistatekitinih, geógrafotekinih, químicotekinih wan geólogotekinih, pampa pankiski nopa Comisión Científica, Literaria y Artística de México (1864-1869), sekih welkeh yahkeh momachtitoh ipan Viejo Mundo. Nochi tlamachtilistli moittaskia teipah, pero nohkia pankiskeh amameh tlen kitlahtolkuepkeh ipan Boletín de la Sociedad Mexicana de Geografía y Estadística ika yaino momoyatihki.

Nopa weyi tekintl pehtoya kemah pehki xix xiwilpilli, wan kemah tlamitia mosemoyatoyaya san kampa weli. Nechikolistli tlen wahahkia nel politoyaya pampa mochihi reformatlanawatilli, namah kena nesiyyaya eli republicana. Nopatlak nochi costumbres, nacional yolistli eliyaya seyok pero nohka onkayaya kualantli, “nopa bola” ken nochimeh kinixmatiyayah, ika itlatzotzo levas tlen kinwikayayah san kampa weli, kichihtoya ma mosemoyawa nohkia kaxtilantlahtolli, wan ipan nopa kawitl nohkia motemachtiyaya

ipan públicakaltlamachtiloyan kampa ika fuerza monekiyaya momachtiseh “tlen nacionaltlahtolli”.

Miyakeh nechikolistlanawatiyanih panokeh wan nohkia onkak miak tlatewilistli nochi yaino kipatlakeh miak tlamantli. Nochimeh tlakameh wan siwameh namah achi mahmawiyayah, pero nohka kinekiyayah nopa altepetl ma momoyawa. Tlatlankeh república wan liberalismo, mexkoewanih tlawel kinekiyayah ma ayohkana motewikah wan ma onkah tomih, yeka kinekiyayah ma motlali se yankuik nechikolistlanawatiyanih tlen kinpalewiskiah moyolchikawaseh, moihliyayah ika owi mochiwaskia, tlen yaino moitzkihki teipah Porfirio Díaz.

Kemah pehki independencia wan mochihi consolidación republicana
tlanki motepostlahkuilowa ipan septiembre metztli
tlen 2021 xiwitl ipan tepostlakopinaloyan tlen
Gráfica Premier, S. A. de C. V., Calle 5 de Febrero 2309,
col. San Jerónimo Chicahualco, 52170, Metepec,
Estado de México, México.
Iixko ni amochtli tlen Pablo Reyna.
Tlahkuilolli tlamantli wan tlakualtlalistli tlen Víctor H. Romero.
Kikualtlalki ni amochtli Dirección de Publicaciones tlen weyi
kaltlamachtilyan El Colegio de México
Ni amochtli, mokuatlalki pampa moilhwichiwa 200 xiwitl tlen
independencia tlen Mexko, ni tekitl kipixki 3 000 tlakopintli.

De la independencia a la consolidación republicana
se terminó de imprimir en septiembre de 2021 en los talleres de
Gráfica Premier, S. A. de C. V., Calle 5 de Febrero 2309,
col. San Jerónimo Chicahualco, 52170, Metepec,
Estado de México, México.
Portada de Pablo Reyna.
Tipografía y formación de Víctor H. Romero.
El cuidado de la edición estuvo a cargo de la Dirección
de Publicaciones de El Colegio de México.
Esta edición, realizada para celebrar los 200 años de la consumación
de la independencia de México, consta de 3 000 ejemplares.



C EL COLEGIO
M DE MÉXICO

EDUCACIÓN
SECRETARÍA DE EDUCACIÓN PÚBLICA

